

傅與礪詩文集



傳

變

鳳

詩

文

集

一

十

卷

258011



吳興劉氏  
嘉業堂刊

一  
十  
齊

序

孔子曰詩可以興可以觀可以羣可以怨朱氏釋曰興者感發志意觀者考見得失羣者和而不流怨者怨而不怒四者之事不同而其序宜有先後蓋見他日論詩禮樂則首曰興於詩詩者志之所之以其志感人之志者孰不足以有所感發哉然則興者豈非吾先乎感入之道莫尙乎聲音人焉寂然泯然忽而歆起震奮動蕩淪浹入之深而化之敏者斯其效曷從而至哉古人云聲音之道與政通夫聲者合天地之大氣軋乎物而生焉人聲之爲言又其妙者則其因於一時盛衰之運發乎情性之正而形見乎辭者可瞻已故曰治世之音安

以樂其政和亂世之音怨以怒其政乖亡國之音哀以  
思其民困正得失動天地感鬼神莫近於詩夫詩道豈  
不博大哉要其歸主於詠歌感動而已斯義也司馬太  
史嘗聞之矣其言曰三百篇孔子皆弦歌之以合韶武  
雅頌之音夫既合之則當時存什一而去千百必其不  
合者也深矣哉聲音之於政也聖人蓋取之矣新喻傅  
汝礪妙年工詩自古今體五七言皆塵塵焉力追古人  
有唯恐不及意間示余以所著編曰牛鐸音者讀之連  
日不厭聞其音而樂焉以爲誠識所尙者因揭孔子之  
言詩徵以師說遂演繹以告之天歷二年四月一日范  
惇書於百丈山房

序

自至元建極大德承化天下文士乘興運迪往哲稍知  
復古至於詩去故常絕模擬高風遠韻純而不雜朔南  
所共推而無異論者蓋得江西范德機焉德機沒後又  
得其鄉傳與礪焉德機盛矣余每讀與礪詩風格不殊  
神情俱詣如復見德機也然德機七言歌行勝與礪五  
言古律勝餘亦在伯仲之間而德機得盛名時年已過  
與礪使與礪及德機之年不知又當何如也天下文章  
莫難於詩劉會孟嘗序余族兄以直詩其言曰詩欲離  
欲近夫欲離欲近如水中月如鏡中花謂之真不可謂  
之非真亦不可謂之真卽不可索謂之非真無復真者

惟德機與礪知之及此言之及此得之及此故余傾倒於二君焉而德機已矣余無能爲矣庶幾猶有若與礪者他日足爲學詩者之依歸也傳君初字汝礪余以天下同其姓字者眾也而易之曰與礪且以與與汝聲相近而便於改稱也元統三年九月辛巳朔揭傒斯序



序

詩之爲學盛於漢魏者三曹七子至於諸謝備矣唐人諸體之作與代終始而李杜爲正宗子美論太白比之陰常侍庾開府鮑參軍極其風流之所至贊詠之意遠矣淺淺者未足以知子美之所以爲言也崔顥人品非雅馴太白見其黃鶴之篇自以爲不可及至金陵而後彷彿焉其高懷慕尙如此誰謂其恃才傲物者乎求諸子美之所自謂盛稱文選而遠師蘇李詠歌之不足者王右丞孟浩然而所與者岑參高適實相羽翼後之學杜者多矣有能旁求其所以自致自得者乎是以前宋之盛亦有所不逮矣國初中州襲趙禮部元裕之之遺

風宗尙眉山之體至涿郡盧公稍變其法始以詩名東南宋季衰陋之氣亦已銷盡大德中文章輩出赫然鳴其治平集所與游者亦眾而貧寒相望發明斯事者則浦城楊仲弘江右范德機其人也楊之合作吳興趙公最先知之而德機之高古神妙諸君子未有不許之者也其後馬伯庸中丞用意深刻思致高遠亦自成一家人觀者無閒言而進士薩天錫者最長於情流麗清婉作者皆愛之而與前之諸公先後淪逝識者然後知其不可復得也德機之里人傅君與礪始以布衣至京師數日之間詞章傳誦名勝之士無不倒屣而迎之以爲上客臺省館閣以文名者稱之無異辭豈非其風韻足以

及於予所道諸君也哉予去國十年與礪自交趾使還  
以家貧親老授南海文學以歸嗟夫上林千樹豈無一  
枝以棲朝陽之羽哉而一官嶺海之不厭何也前數年  
諸公相知者多散出於外今明良一廷無所忌諱清澗  
之蒲海灣之木不足以久煩吟詠也必矣書其別後稟  
如此遲其北還則沈鬱頓挫從容溫厚有起予者何幸  
於餘生親見之哉作傳君與礪使還新稟序至正辛巳  
六月朔虞集伯生序

...

...

...

...

...

...

...

...

序

渝舊隸袁山水最爲秀麗扶輿清淑之氣鍾爲人物代  
有其人鄭李以詩鳴於唐二劉章謝以問學詞章顯於  
宋燿乎其相望也近世范太史傅廣文相繼以詩名於  
時文章鉅公莫不推服而海內搢紳士興於詩者咸師  
仰之信乎黃鐘大呂之音震於瓦缶雷鳴之餘有耳者  
莫不傾聽也傅廣文詩舊有刻本而燬兮弟若川恨其  
久而傳弗廣也欲重鋟梓介友人袁大賓徵序其端余  
觀三閣老之文獎許如彼其至奚敢贅爲之辭而若川  
愛兄之情嗜學之力洎吾渝山川人物之美不可蓋而  
弗彰也遂書是語以綴其後至正戊戌仲冬月同郡胡



傅與礪詩集卷之一

嘉業堂叢書

任正宋應祥伯禎點校

弟傅若川次舟編刊

雜著

清安堂賦爲思南李經歷作

夫何茲堂之靜佳谿谷繚以閒深泉歷除而細響木交  
戶而繁陰世溷濁其汶汶咸役體而勞心爰順時以息  
養況顯敞而開襟羌怡寂以禦煩諒君子之所廬感人  
生之長勤寒暑迭而相驅靡徇逸而非害孰忘患而恆  
舒雖燕樂其何傷將不見之是圖庶依仁以自止潔吾  
穢而休居

敬業齋銘

惟茲生人均厥受命莫貴惟德莫尊惟性惟性如何萬  
善斯全君子於學思罔或愆惟德如何有積乃大君子  
於學思罔或懈詩書六藝進退灑埽近思弗遺上達有  
道夙興夜寐惟一乃心毋終食弗念毋閤室弗臨毋若  
彼教弈鴻鵠是惑辟茲服田力乃有得聖或罔念亦之  
於狂孰曰予玩而聖之望敬之敬之遠實邇是基有節  
高山君子之儀

楚辭

楚漁父渡伍胥辭劍圖歌

江有阻兮路有峽時將迫兮來何遲子弗渡兮我心悲



既渡子兮我何以劍爲吁嗟行兮子毋我疑

黃鵠歌爲劉母王氏作

黃鵠孤飛兮傷其正儔生則同巢兮寡處何求死寧敢  
愛兮孰將其雛山則有木兮隰有泉流翮飛何知兮雛  
飽以娛雛既羽翼兮將母來休毋詒母辱兮無使心憂

寄題袁氏具慶堂

高堂兮巍巍華采衣兮芳菲瞻父母兮壽豈兄弟翁兮  
孔懷出則仕兮自公入則養兮於堂之中昊天兮福爾  
錫眉壽兮未已夫人兮自有美子曰予歸兮將父與母

松澗引 并敘

松澗引者爲林氏子晉作也晉父信卿本中山人客

游衡陽樂其土遂居焉信卿死晉復築堂其居之偏  
題曰松澗志其師之言也晉讀書善鼓琴元統初過  
家上冢因北至京師無何思其所居卽慨然別故舊  
而去爲作琴操三疊以贈之

澗之水兮泠泠上有松兮鬱青青嗟衡之居兮吾所寧  
胡淹留兮於帝京

澗之水兮揚清波上有松兮被女蘿我嘯兮我歌胡不  
歸兮歲蹉跎

澗之水兮石楚楚上有松兮以風以雨築吾居兮其下  
誰將歸兮來吾與處

歸來三曲送李建中

月皎皎兮河漢長黃鵠在天兮招我以翱翔天氣涼兮  
夜未央援鳴琴兮託宮商商聲作兮風撼撼歸來兮天  
路杳渺不可以終極  
月皎皎兮夜旣寒白露下兮衣裳單南風一去兮何時  
還援鳴琴兮曲再彈曲再彈兮天地爲秋歸來兮清都  
之上不可以久留

月皎皎兮寒風作蜺啾啾兮怨鳴鶴常恐秋遂爲冬兮  
羣物以蕭索援鳴琴兮忽不樂忽不樂兮思吾土歸來  
兮山中之人不可以無父

芳草辭爲杜若洲作

乘吾舟兮沅湘攬芳草兮朝行續眾美兮在子懷靈芬

兮不能忘進子舟兮極浦將誰思兮遠者采杜兮葺蘓  
雜之兮宿莽羌姣服兮夷猶撫子帶兮宜修掇何充兮  
佩幃荃何化兮爲茅沅何爲兮湯湯湘何爲兮浩浩滿  
庭兮艾蕭眾紛進兮謂予不好望洞庭兮楚之野路漫  
漫兮夕愁予思君子兮孰後來結芳菲兮吾誰與

芝草歌

玄化順兮日月昌至和蒸兮地發祥燿靈草兮賁齋房  
雲繽繽兮流玉英五色爛兮昭文章何所徵兮德芬芳  
爰作歌兮著勿忘我君子兮思永臧

三言

滋之水奉題蘇氏滋谿書堂

滋之水濬且長流安極沛洋洋 滋之涘德所履續芬  
芳萃厥美 滋之水澹而文豐迺積淑後昆 騰聲詩  
播金石逾千祀永昭德

右四章章四句

五雜俎

五雜俎機工絲往復還城中兒不獲已生別離 五雜  
俎園中花往復還將雛鴉不獲已貧去家

四言

正月二十日壽揭學士

吉月美君子有德以壽也

吉月之正日旣陽止君子之生辰亦昌止天錫之德孔

茂且植允善弗易惟君子之福 其善伊何如芬如芳  
如芬如芳于前人勿忘其福伊何如山如岡眉壽以康  
時君子之慶 慶維雲矣亦施於天華之蘊矣亦被於  
人君子有言有斐其文允也令人德音振振 德音振  
振民之正矣百祿旣臻神之聽矣飲我春酒壽考是承  
彼廈之安于木之憑曰有君子時邦家之興

吉月四章三章章八句一章十句

東臯詩題長沙易君美存耕卷

瞻彼東臯每每其田孰其甸之維古之賢 其田每每  
其稼緜緜日月以治厥有豐年 維田弗治維莠生之  
維心弗制維欲傾之 我思古人有播斯獲子孫其承

庶茂厥德

東臯四章章四句

傳與礪詩集卷之一

東皋四章章四句



傳與礪詩集卷之二

五言古詩

雜詩五首

天天園中桃鬱鬱松上枝春陽發新榮貞脆誰能知一朝繁霜墜百卉各已萎青青乃自保不爲時所移向非厄歲寒何以別奇姿

植蘭彌九畹種菊被三徑幽芳因殊姿馨德良可並寒蘭以爲美餐菊以資命晷言理蕪穢恆使枝葉淨蕪穢苦易侵枝葉苦不盛豈無桃與李貴此諧野性

窮巷有畸人夙夜勤古道敝衣適至盩疏食恆不飽歌聲若金石顏色終歲好豈無當世念所趨惡佻巧美玉

傳記二  
不足珍懷義以爲寶

閒夜坐中庭素月流我懷鳴琴發玄思俗音難與諧微  
颺經前楹餘響正裴回欲歌南風曲聽者良已希願言  
薦清廟復感鳳來儀

異人言種石可以致雙璧千金受玄祕辛苦乃有獲溫  
其比君子韞櫝良愛惜青蠅易爲汗恆恐傷厥德連城  
不願售思以置君側終歲無與言持之將安適

從軍行

征夫遠從軍徒旅無時還炎暉薄五嶺修蛇橫道閒朝  
食未遑飽夕寢焉能安駕舟涉廣川驅馬登崇山生別  
已不惜矧畏道路艱豈不懷室家王事有急難生當同

富貴沒當同憂患

少年行

長衢若平川輕車馳流波上有都人子明肌豔朝霞芳  
塵揚遠風白日耀舞羅少年輕薄兒調笑相經過狎坐  
酌美酒日暮酣且歌千金罄一笑豪右焉能加時俗誇  
朱顏美女悅春華春華豈不好遲暮當如何

經采石

未明發蕪湖終飯次采石大江天同瀉巨浪山與敵松  
寒蒼蚪姿厓古老鐵色其傍有仙冢云是李太白生爲  
長庚精沒與大塊息因思開元中出入蒙帝澤御羹白  
瑤林宮硯青玉滴恩榮日深重意氣何赫奕酣歌泰華

傳言二  
小豪飲渤澥窄頗聞宮中怒遂有天上謫殷亂微子行  
楚昏屈平斥嗟哉唐家帝同往逝安適何年爲茲遊千  
載但故迹騎鯨信縹緲捉月詎昏惑得非厭塵羈無乃  
達寄客翻然委之去富貴何足惜杜陵平生友夢寐頻  
見憶白骨焉所求青山亦岑寂相去嗟已遠令人心悲  
塞舉酒欲醉之帆去招不得

晚憩

朝濟黃河流暮馳長路塵路長無時已河險難具陳高  
歌激層霄緬懷古之人剗木以爲舟斲木以爲輪自非  
制作聖何以通萬民飄飄遠遊子勿用歎苦辛

雜詩四首

皎皎素明月娟娟含令姿浮雲遽起滅圓景遂參差山  
川莽回互天地亦相疑焉知冥昧中明潔終不移弦望  
有恆運清光寧久虧

寸隙塵所投片言害所藏行徒惡蹶馬豈復惜其良榮  
辱且自致否通亦靡常修正未蒙福爲邪欲何望天道  
豈遠人撫心徒自傷

溫溫匣中玉什襲慎自持荆和始見賞舉國競慕之青  
蠅遽言集魚目亦相嗤昔爲人所寶今爲人所疵保終  
諒庶幾逝者已如斯  
白璧易爲毀常懼世所捐憂心日悄悄自好反成愆君  
子遠嫌疑胡爲偷自安始知五山累乃在半辭聞盜金

信不疑攫塵感子淵故心苟不易既往復何言

飛雪篇

北風厲中宵明晨散飛雪連翩素彩動泱泱玄陰結羣  
林互騰耀眾景紛變滅既增寒竹姿復宜青松節因高  
始成勢遇坎俄就缺東西衢路閒來往昧深轍眾穢交  
凌踐幽光自娛悅皎皎恆易汗無爲恃清潔

寒竹篇

寒竹依澗阿石生何磊磊滋息因厚地生成藉玄宰春  
陽散華景枝葉被光彩及茲芳歲闌使我憂心痲遽悲  
凜節變但恐驚塵浼寒燠既異宜遲暮復焉悔淇園蔭  
未息嶰谷音猶在君子夙相好深懷邈雲海竹性諒靡

遷人心懼中改願言卒封植勿使傷樵采

梅花曲

素芳何婉婉姣服耀江湄美人慕佳植託根乃在茲朔  
風振嚴冬孤花難自持流塵復浩浩焉得不爲緇芳筵  
坐積思急管夕傷離傾筐墜佳實所願及良時感彼李  
下人正冠乃見疑禮義夙所敦人事偶乖睽撫樹倚墻  
歎中心誰復知

刑部三主事幕嘗有菊一蒂三花尙書僚屬咸  
異之號三台瑞品屬朝之大夫士能文辭者傳  
詠其事至是奎章趙授經以其卷見及爲賦五

言一首

西曹應秋商庭戶肅以清金行戒時令嘉鞠正羅生含  
精麗前除流耀發華英二萼專夕秀眾芳謝春榮連枝  
靡阿比同氣斯合并匪茲恤明刑何以獲休徵願言保  
初服永懷歌德馨

勸耕亭

日月靡閒暇四序更運之斯人務作業矧敢怠遑時負  
耒適西疇恆患耕作遲仲春時雨至羣物具含姿牛食  
青澗阿鳥鳴芳樹枝興言播嘉穀夙夜將耘耔豈不懷  
逸居亦念寒與饑但使秋稅畢聊樂及我私羲農雖已  
遠沮溺不吾欺努力順人命素餐非所知

右詩爲鄒福作也福豐城田家子事藝文揭先生餘



力能讀書爲聲詩又喜國語習通其學然樸慎不忘  
乎勤先生甚喜之嘗手書福自爲詩七首敘其所從  
出京師爲文詞者福多得其題述是何福之能使人  
愛若是也學者果皆繫所出乎於是益知藝文爲有  
德矣

寄題奉元張氏望松亭

青松翳高墳重壤閉玄陰孤亭何鬱鬱林氣肅已深白  
雲翔其巔悲鳥相與吟伫立以瞻望哀思不能任時祭  
羅豆觴祖考聿來歆歲宴寒風至零露亦在林危柯起  
悽愴合人生悲心逝者已如古來者復爲今

清明日遊城西詩

并敘

子資嗜幽澹所遇名山水興至輒翛然徑造興盡卽  
休無留滯之意客京師三年聞西山之勝未至焉乃  
元統二年二月二十五日爲清明節風和景舒卉木  
妍麗金華王叔善父四明俞紹芳同里范誠之與予  
從一小蒼頭載酒殺其出遊城西遂至先皇帝所創  
大承天護聖寺縱觀行望壽安香山而還先是約信  
宿徧歷山麓諸寺迺止至是謂三子曰是行適意爾  
卽一詣而窮其勝豈更有餘興哉相與登高且藉草  
而坐酒數行約賦古詩五言六韻五章道所得之趣  
書二十字亂器中人探五字以爲韻時誠之止酒予  
又性不飲叔善紹芳脫冠縱酌旁若無人予亦吟嘯

自若都人士游者車服聲伎相闐咽金壺玉槃羅列  
照爛意若甚薄余數子者而又有若甚慕者焉旣夕  
罷歸所賦詩各繕寫爲一卷明日會余於杜氏館中  
夫子在同游間年最少而好任意興三子不以予年  
少而奪之誠之與余俱不舉酒而能從三子之飲不  
厭其醉是游不已樂哉敘以識之

矐靈動若木晨烏鳴東窗興言集儔侶西郊出翱翔登  
高望荆吳延日極三江密林何菴蕤嘉樹翳蒼蒼感此  
時節遷慨然思舊邦乘風卽清曠薄使我心降  
出自城西門未知道所窮並驅涉長阜山川鬱何雄纍  
纍道邊墳四顧生悲風茫昧萬物始冥冥天地終陰陽

相推化焉知搏埴工誰能同朽木俱盡委蒿蓬  
梵宮何巍巍白日耀流藻前楹交網樹陰階被靈草宿  
昔構華麗河沙施七寶丹霞通飛閣清飆激馳道車馬  
縱橫至虛谷漫浩浩飛龍逝不返令人傷懷抱  
游子愛良辰出門各有攜陽春發惠氣好鳥鳴喈喈芳  
花明曲渚新楊拂大隄羣物紛相悅斯人多所懷飄彼  
陌上塵化爲水底泥百年亮如此不樂復奚爲  
長風度廣澤清輝汎遙甸層宮岌崔嵬落景駐遐眷羣  
觀各侈靡金壺列豐膳幽賞聊共娛誰云極遊衍喈喈  
水中鳧翩翩雲間燕微生亦何勤志足非所羨

寄題吳興馬氏清華堂

豐堂翼華構陽景麗前楹曲流相紆帶軒牖一何清微  
波涵素暉嘉卉發丹榮中庭列圖史芝桂亦羅生有酒  
介眉壽內無憂患并朝弄石泉水夕采玄玉英從之不  
可得願欲濯塵纓

題淵明漉酒圖

淵明性嗜飲所遇適其真漉酒東籬下邈若旁無人捐  
紱非所吝焉愛頭上巾田園日成趣松菊相與親百年  
何爲爾酩酊及茲辰陶然至和內混沌以爲鄰

送陳助教眾仲赴江淞儒學提舉

登高送將歸車馬橫道周白日明大河遠望悵悠悠宿  
昔違鄉國慷慨事行游懷寶非固售同氣乃相求茲焉

去皇邑被命赴南州  
詵詵胄子徒惻惻不能留  
逝將敷文教邇可被遐  
陬我無千金贈臨別但  
懷愁獨有清商曲可以  
慰綢繆  
秋風吹浮雲鳴雁復南  
翔山川何慘慄草木日夜  
黃客行歲云除黽勉懷  
舊鄉君行卽吳會執別  
此河梁淮泗多奔流雲  
海浩茫茫靈颿翼飛  
臚馳景曜征裳去途日  
以遠來會日已長援之  
不可得躑躅情內傷

瑞芝曲

并引

瑞芝曲者爲麻陽簿任君作也君掾順元帥闕時芝  
產於所寓之地以爲瑞圖之以傳觀四方思州劉文  
學來京師持以示余求詠其事按王充論衡土氣和

則芝草生又鵠冠子曰王者德盛則芝草生醴泉出  
然則祥瑞之至有以也任君是圖豈私有之哉亦將  
以侈國家之瑞也吾聞古者以君子在位賢人眾多  
爲國休祥任君繼自今相率其僚爲豈弟之政以布  
天子之德於民則爲祥莫大焉草木之瑞云乎哉

聖人運元化和澤被遐方黃靈啟幽祕朱草發嘉祥  
暉晨敷秀藹藹夕含芳慶雲流瑞露丹霞沃太陽  
網緼所凝結玄造亦何常夷居勿云陋斯人樂以康  
繼今崇令德諸福應時昌

題陳氏菊所

陶公逝已遠舉俗慕高情之子厭塵雜開徑挹其清晨

起除翳菑種菊蔽前楹結根固其所獨立誰爲榮中園  
何菜敷綺席蔭朱萱車馬日自臻絲竹騰妙聲凝霜旣  
被野繁露復盈庭百卉豈不佳朝敷夕已零東籬信蕭  
索可以託幽貞

題董氏恩榮堂樂義取榮啟期之言

董生築高堂於以養其親溫軒納飛旭涼牖謝流塵大  
椿蔽庭前慈竹映冠巾中廚足甘脆可以奉昏晨有酒  
及嘉賓餘歡洽四鄰生當隆盛時至德覆無垠羣動各  
蠢蠢靈明貴斯人旣復爲男子夙夜懷苦辛年命恆幾  
何胡爲勞其神所以榮公者樂世乃忘貧矧茲堂上翁  
安富殊等倫夫婦齊壽考遐福日以臻有子才且賢有



孫復詵詵如何不爲樂言笑及良辰好鳥四時鳴佳花  
萎復新黃髮日娛戲焉知冬與春

挽張隱君

峩峩浮柵山鬱鬱彭蠡濱中有隱居者消搖畢冬春讀  
書偈城府杖屨率耕耘雞黍會田家酒醪合四鄰既醉  
亦詠歌富貴如埃塵一朝厭浮世含笑返其眞貴賤同  
一盡各爲正與墳所立苟不忘浮榮焉足珍

彭叔璵得杏花一枝歸置小齋同居王叔善甫  
邀余同賦杏花曲人一章約五言五韻

朱葩含朝景流芳自中園顏色一何麗灼爍耀櫺軒嘉  
賓從外來臨賞各欣然同根豈不好異處乃殊妍貞心

諒自知脈脈終不言

題叢蕙

蕙葉何青青羅生被巖隴中庭忽邂逅四顧風蕭蕭含  
翹紛旖旎懷馨潔以修時俗苟不佩芳草或爲茅微物  
恆易遷君子內傷憂願從芝蘭化庶異薰與蕝

題草蟲圖

火氣流天地動植紛自形陽卉耀春華陰條敷夕榮昆  
蟲信微細于以託生成守宮夫何慕蠻觸諒奚爭蚩蚩  
伏青蕤跂跂緣紫莖促織焉念寒牽牛不事耕吳公性  
含毒多足復能行莊周齊蜚化晉惠昧蟄鳴玄蟬翳高  
枝君子慕其清蛄蜣溺所嗜汗穢不能靈感茲動中懷

變幻焉足憑羣生各有命鴻化亦何情

送張景陽歸觀

鴻鵠懷遠舉騏驥慕高馳志士多慷慨文墨徒相羈挾  
舟行遠遊翩翩至京畿京畿四方會冠珮交陸離紫宮  
承星辰高蓋岌雲霓聖人內垂拱至德徧羣黎求言逮  
微賤一善思罔遺君子道旣速胡爲忽言歸嚴冬霜霰  
零晨起候鳴雞送者亦在門南望各逶迤願君自貴重  
歲寒勿相違

題下關

大虛憑網緼萬化更往還函生雖異靈蘊德諒斯全聖  
人繫周易茲道廓以宣鬼神無逃情天地泄幽玄稽微

內無象舉大窮八埏研思何能極精義乃不煩來者紛  
討求窈窕元氣端君子依恆運小人昧至言憂道不可  
忘正利非所先需進良有時知命復何患

使至眞定赴都計事遇大雹傷穀時逆臣唐其

勢誅

午發滹陽城暮投郭村店人煙樹相錯分野昂所占連  
屋臨古塗幽花垂深塹行旅各已息下馬卸征轡形容  
風日槁衣服塵土染倚牀秋蕭蕭汲井月灩灩舍翁得  
客喜亭長見官厭田家始收穫勤苦供稅歛夜來大雨  
雹婦子憂食歉還聞公侯家終歲酒肉饜天子今聖明  
誅鉏盡奢僭覆車監前轍焚室戒微猷禍淫良已速福

善終必驗區區予何人行役奚足念

天風吹中山北道傍正阜  
自出城北門平野互長雲道傍多高阜纍纍若正墳豐  
草爲不生白日何氤氳焉知非陵墓下有長逝人棺槨  
化爲土衣冠腐爲塵既往不可見來者不可聞百歲何  
足恃爲生良自勤

八月十三日至京

孟秋涼颿至驅車出西門去京始彌月白露忽已繁茲  
行亦何爲於役義所敦山川旣悠遠晨夕違清温我馬  
北以南豈不慕正園努力在王事賢勞奚足論

九日夷山驛

馳驅涉長道時節良易更去日能幾何商飊颯以盈玄  
蟬號且息羣雁翩南征茲辰揆重九在俗豈殊情抗袂  
出虛館登高望舊京圓穹無留翳素顙有餘清延矚周  
四遐但見古時城頽宮委蔓草喬岳襲前名茫茫陰陽  
閒感此百慮并我性不解飲虛觴聊自傾

使還至長沙侍嚴親及外舅孫公遊

仲春景氣妍卉木具萋萋中園凝芳暉時鳥鳴且啾游  
子遠于役歲晏乃旋歸父母日瞻望親戚久睽違及茲  
時物佳少長翕相宜攜壺出東郭聊以舒永懷鴻鵠隨  
天風焉能忘舊樓王事亦可念勛我以驅馳願言飲春

酒各保黃髮期

歌風臺

黔首厭秦暴龍德奮炎劉英雄乘天誅拔劍起相仇天  
風隳陵谷飛雲揚九州天下事既定懷土未遑休置酒  
宴高臺中廚進庶羞悲歌落林木父老皆涕流功臣日  
殖醢壯士復何求至今豐沛間長顧使人愁故鄉帝所  
愛零落遺舊丘大運各有終聖賢誰能留焉知萬歲後  
魂魄復來遊

雲松巢爲劉益之題

青松矗雲際此有巢居者心清謝秦爵根遠思夏社斤  
斧庶不戕棟梁誰能捨常懷太古世木處人事寡高步  
凌巖巖幽棲據瀟灑星河入戶動霧露當虛瀉重霄紛

相屬九域莽在下磅礴俯大氣微茫見平野飛仙遙相  
卽風翻時可把浩浩區中塵流景若馳馬鳳鸞或叢枳  
燕雀乃大廈所以安一枝萬事齊土苴

送范悅古再之江西憲史

客行辭國都南望越山河燕趙宛相距吳楚爲我家別  
離生永歎送子以長歌長歌慷以慨憂憤一何多大道  
日隳墜逝川無還波浮雲翳中天明月乃爲瑕君子燭  
微詞小人祇自阿素心苟不渝非意焉足加嚴霜厲松  
柏日出當奈何歲晏將自見願勿改其柯

疾風暴陵谷所觸爲我仇林木無寧枝大江汨其流悄  
悄君子心熒熒增隱憂歲月忽馳邁行道阻且修白日



臨九圍環照靡窮陬卞生獻奇璞再刖始見收不有固  
窮節焉能忘怨尤行矣勿重陳居易復何求

送別宋子與

人生若浮雲冉冉各四馳居同桑與梓會合乃在茲華  
月洞靈襟高霞敷麗詞晤言永相好暫失繫懷思矧當  
萬里行策馬從此離舊鄉未同返胡能忘嗟咨仲春景  
氣妍翔鳥悅深枝弭節湘川滢迂轡俯江湄及家洵云  
樂懷土非所期榮名務不朽慎勿棄良時

用謝玄暉入朝曲分韻送馬中丞赴南臺得收  
字就用其體

金陵鬱迢迢行旆曖悠悠蘭臺清露集松庭積靄收白

何詩二  
驚迴修渚朱鳳矯崇正離離曳青綬  
陛陛振彤騶遠甸  
芳風散神都旭景浮臨軒結沖想  
還車寧久留

朝出國南門

朝出國南門北顧望重城紫宮承星辰  
雙闕岌雲興貴  
賤各有安孰知昔所營天地忽震盪  
山川皆沸騰虹霓貫白日鳥獸相號  
鳴達士多憂傷貪天喻自生伫立倚  
長歎天道安可明

西行出周道

西行出周道歷覽至平原漉澗何寂寥  
豐鎬若浮煙二  
公營洛邑王業亦已艱禾黍忽離離  
麥秀復芊芊不見  
舊宮室但感書所言嬴氏滅諸侯  
雒跨六合閒商君用

法令一朝廢井田赫赫彼宗周在昔多聖賢消歇無復  
餘何況恃強堅

和周伯温翰林齋宿

蒼顙散微颯圓靈夕清穆詞林屈嚴祀齋房敞空曲臨  
下赫明明在公誠屬屬風條象九奏露樹彰三沐書告  
縟柔翰陳詩列明燭從昏禮紀虔迨旦興猶夙皇德亮  
攸歆景命忱有僕升氣膺蕭閒奠幣立纁束神休對精  
享至和敷百祿將事庶無懈來祀永相矚

秋日懷揭翰林二首

涼風吹庭樹天地何蕭索玄蟬寂不鳴羣鳥飛相失寒  
氣日以至誰能無家室驅車望江介道路焉可述河濟

無安流原野皆蕩潏稷黍寧復遺草木但蒙密虎豹無  
時號蛇龍多夜出對此不能言懷人易成疾  
遠行去鄉邑單棲無匹儔黃鵠鳴中天夙昔乖所求東  
西無恆舍南北異遨遊同居更離處誰能心不媯日月  
逝無厭弦望疾若流咫尺踰千里翹思若三秋白露淒  
以降寒風忽我邁蘭芳委巖谷蔓草靡道周君子多思  
念感物諒懷愁河海豈無梁風波安可由且復加餐飯  
無爲增隱憂

送仇繼善歸光州

季秋寒風發時物日淒淒鴻雁鳴索羣野鳥求其棲寒  
暑不貸人客游多所懷昔爲山上雲今若水中泥曲躬

徇微祿時俗誰能諧大道良阻修中路顧低回朝發城南門日暮淮水西歸哉從吾志貴賤焉可齊

送蕭介石

游子慕名都負志辭草萊驅車望國門宮闕何神哉月入軒車動雞鳴閭闔開王侯多宴集弦管切雲哀燕俗信英雄自古皆愛才黃金致賢士賓客四方來俯仰時既遷蔓草沒荒臺不見古時人何以舒永懷舍茲復南去怊悵不能裁  
冉冉歲將暮寒氣下巖霜征夫懷往路執手野徬徨草木既蕭條山川悠且長念子今何嚮言適鄒魯鄉泰山鬱崔嵬沂泗浩洋洋自昔生聖人衣冠宿所藏詩書被

傳言二  
遺俗禮樂未云亡豈不念時命斯道不可忘願求同心者攜手與翱翔

題胡氏存菊堂

素商薄庭戶豐草日以萎晨興顧林薄百卉無復遺叢菊依前除遲暮獨相依清飆振落葉零露發幽姿淹留諒有俟暴盛非所期對此時物佳欣然賦新詩嘉賓旣在門有酒復盈卮日暮采其英斟酌及茲時四序委元化焉知榮與衰

九日會飲和胡古愚并簡諸公

凜秋肅已至榮木遺故枝蕭蕭鞠在庭汎汎酒盈卮興言愛重九良會欣及期飲酒非所性杯至聊共持天地

嗇余閒義和逝若馳陰陽紛離合變化雜神奇太古不可還  
漳風日已漓佳辰樂清讌言詠竟餘暉微月忽在楹驚  
颿滿裳衣斯興長未極攜手且同歸

梓人圖

聖人肇宮室制作配陰陽般輪守規矩經畫故有常營  
構在斯須斤斧若飛揚深林產喬木可以勝棟梁大材  
諒不遺細者各相當青雲岌華廈丹疏通曲房日月齊  
晦朔天地擬圓方茨墜旣具周丹堊亦輝煌居處信崇  
高先民不可忘君知太古世巢穴以爲堂

和趙德隆秋夕雨

落景翳重城凝陰起初夕蕭條飛雨至散漫輕颿激灑

幌靜彌多暄檐暴復息清商亂急管遙怨生離席游子  
恆念鄉氣淒感時易旣興北風歎亦抱南山戚晨雞不  
廢度征雁無寧翼嚮道乖夙期寸陰違所惜詠歌良可  
興幽懷坐填積

和韓都事秋夜

招搖指西北河漢被天東四節自成歲衰榮焉可同陽  
卉日蕭條陰林不復濃慷慨夜多念太息生淒風鷓鴣  
蔽中天野草集蜚鴻羣物各有適焉知心所從

雪中送宋上舍仲敏歸滑州省親

北風何烈烈雨雪亦雱雱遊子去成均將歸古靈昌詩  
書豈不樂歲宴懷我鄉我鄉伊可懷父母在中堂休告



亦有時定省焉可忘浮雲踰大伾白日照宣防子行日  
已至送者各盡觴當歌念遠遊令我媿中腸

寄題鄱陽劉氏靜觀齋

萬化紛往還陰陽相終始人生齊性命誰能獨離此寂  
寂山中士冥冥會其旨大窮六合外細攝秋毫裏因茲  
達變化何嘗感生死林春野花發庭雨流雲起對坐終  
日閒悠然閱圖史

菊坡爲白公巖賦

嘉菊生林下含英覆坡陀離離帶長阪萋萋閒層阿靈  
飊度鮮蕊濃露濯寒柯靜者愛幽姿對之行且歌朝作  
常不忘夕息以婆娑凜秋薄原野百卉忽已過偉茲霜

中秀獨立諒殊科始志苟無違芳菲豈在多

四月十四日發京

六龍西北馳羣鳥東南翔感我客游士心神隨飛揚迢  
迢踰大河怳怳越崇岡已驚時序易復念道路長驅車  
出東門浩歌慨以慷燕薊豈不樂吳楚爲我鄉父母久  
違離兄弟不在旁當茲遂歸志聊可慰中腸

劍門圖

劍門天下險亦復天下壯崢嶸扼西南氣欲軋萬象石  
壁摩往來風湍束奔放深蟠虛無底峭出日月上二儀  
含崎嶇萬古設眺望一夫或當關強敵不敢傍胡爲昔  
人國恃此亦傾喪聖朝今無外皇化極浩蕩勢狹秦漢

爭治同唐虞讓乃知不在險六合德可王前年南中行  
其地少平曠懸車度重隘東馬下疊嶂翻疑蜀道坦劍  
閣固殊狀及此觀畫圖問關愁西向浮雲從中來日暮  
一惆悵

城西墓田

世傳神仙壽舉俗爭慕之不見松與喬高墳但纍纍松  
柏蔭路衢行者慘透遲遙遙千載心只爲後世悲春秋  
更代謝萬化諒如茲自古皆有盡令名百世遺生時不  
努力死後竟何爲

送何志友抱琴遠遊

客從東南來辭我將遠征九州何遼邈道路縱復橫商

飄振長林露氣淒以清感此歲月變念子將何行聞有  
太古琴鼓之南風生一奏天地和再奏萬物成知音亦  
已寡持此感人情願言薦宗廟可以備咸英

題胡質夫更好山亭

盤盤青山阿萋萋嘉樹林中園誰所治亭榭藹沈沈貞  
松蔭奇石修竹亂珍禽時雨濯丹葩春陽敷綠陰游觀  
日成趣巖谷有清音他山豈不好誰能同幽襟矧茲蓄  
靈秀芳氣蔚以深油雲始膚寸可以致甘霖沛然澤羣  
物乃復返高岑始知茲山靜仁者諧夙心卽此得逍遙  
浮名何足欽

題胡信夫一川風月亭

斜川多佳山流水會中園華亭鬱深秀卉木茂且蕃明  
月賁林幽清風行樹間流彩散復定微雲中往還幽人  
坐平石日夕觀其瀾素暉迴衣巾爽氣在櫺軒會心時  
自知意得復何言

贈揲著蕭達則

太極函二儀萬象昔未形陰陽倏變化奇耦互相乘羣  
生六合中動作何營營吉凶紛自致憂吝焉所徵天道  
良已微人事豈無恆聖神發著策揲扞見其情大易攄  
玄祕至言不可更俗流師異端怪妄昧前經達生乃稽  
古茲義日修明願言善其用庶以道自成

挽劉雨卿

達人慕高隱乃在北山陲感昔生離亂弱齡已自持在  
世何所營課子以書詩秋桂擢丹葩春蘭敷紫蕤既壽  
亦且康浮名何足羈一朝乘化盡溘然與世辭天地亦  
有終聖賢各如茲生存苟無憾委順復奚疑

玉芝曲爲鄧彧之作

聖人履昌運至德配方員郁郁休氣翔粲粲靈草鮮英  
雲被素趾甘露灑華顛上有飛鳳皇下有涌醴泉銅池  
詎方秀瑤圃諒齊妍聞昔松與喬采之以得仙願因獻  
天子服食致長年

題顏友立耕樂堂

深居謝輪鞅畢力事田園生世食其勤誰能同久安晨

興負未出日夕乃來還時雨集正隅雲禽鳴樹閒桑麻  
蔚北墉稼穡藹南阡鄰曲多往來斗酒數爲歡誦書不  
求解契道乃忘言在昔譏素餐呾呾多聖賢簞食苟無  
憂作勞非所歎

琵琶怨

美人揮哀絃上客歎蛾眉急響多悲思孰知心所之感  
昔奉綢繆不言生別離誓將桃李顏結君長相思如何  
雙棲翼中路忽乖離不怨歡會難但恐恩愛虧含情冀  
回顧中曲多苦辭君子苟不聽賤妾欲奚爲

團扇辭

團扇昔在時素手不相離涼溫得君意動息亦有儀炎

暑良未徂恩愛豈中衰何言遽相失一旦棄如遺舊物  
諒非貴故心不可移願因新人得持以置君懷

題過氏適安堂

營營俗閒務莽莽城中塵疑冰悲夏蟲惡影笑塗人達  
者悟茲言思還樂我真生世嗟物役誰能勞其神過足  
諒非慕爲歡聊及辰深居無塵雜豐屋麗且新庭柯集  
翔鳥池藻散游鱗觀化獲自然戚戚非所遵庶將依仁  
宅處樂以終身

題蘇氏耕樂堂

少年思薄宦既老思田里耦耕非吾事素食良所恥時  
雨行東臯平疇被流水興言命童稚東作從茲始飯牛



桑苴陰秉耒郊原裏舊麥旣青青新苗復靡靡升堂舉  
杯酌閒暇閱經史有秋庶可待致本聊自喜古人不復  
存斯士亦云已食力吾所安夜行貴知止

題王元載御史爲潘彥賓作幽人瞻綠圖

曳杖緣芳沚引睇陟前岑修篁鬱蔥蒨菡萏構邃沈沈零  
露發春姿流雲滋夏陰蒼輝度行袂碧影赴橫琴美色  
非所貴高節良可欽歲月自流邁霜霰自交侵青青乃  
不渝瑟瑟有餘音比物思衛風瞻望意何深爰求詩人  
體實獲君子心永言託嘉喻聊用寫幽襟

無事外徐氏生意亭

芳春會陽景佳氣蔚前楹春澤亦已和時物日滋榮茫

傳言二  
茫大鈞軸塊北四時成熟知萬象先甲者悉未萌陰陽  
無停化元氣以流行觀茲悟生理人道亦有恆百穀播  
斯穫太倉積乃盈願言樹豐德奕世永其生

飛龍圖

聖人御天下九五應乾元神物何矯矯精氣久乃全屈  
信陰陽際出入有無閒風雲一時合雷雨相後先下顧  
周八方上行窮青天流澤無愆候原野以豐年功成不  
自居寂然歸九淵

觀外偈爲天寧講主慈公賦

團團虛白室了了圓通士心觀乃非目性定猶止水羣  
動紛自形諸緣遞相倚譬如中堂上坐見前林裏空方

無定在內外非可擬凡此分別見皆緣識根起微塵含  
空界玄象標月指應現本無方恆不離所止世人執邪  
見外驚何時已應當離諸礙立悟從此始

題宜春鍾清卿清露軒

清卿能琴

秋氣集太虛夕光溥高樹時聞陰液墜暗識商飆度旄  
旄星動林英英月霏霧涼扁息塵想幽琴寄立悟寂歷  
松上聲逍遙其中趣鈞天澹斜景銀河暖微素古調今  
所稀大音誰能喻仙人飲沆瀣壽命金石固千歲不可  
期空歌徒延慕

挽談孝子

孝子名采字文卿清江人侍父尹零陵父病

傳言二  
顛天乞以己年益父壽已而采卒而父安葬

茂材鄉常山

白璧傷易毀幽蘭悼先顧陰陽孰吹噓修短從所制伊  
人邦之秀少小拔其萃孝友積和順辭華著光麗青春  
何怱怱韶景曄云逝愛親希長年保己非素志至今常  
山下行客揮涕淚芳風吹護草英雲被叢桂去者日以  
長來者日以繼立世務不朽生死徒歔歔顏殤易爲感  
蹈壽何足貴

挽廖節婦

孝子妻

關雎有恆匹別鵠不更雙婉婉令母儀煌煌君子堂事  
夫死同穴誰能易其常皋蘭殞夕露庭菊厲朝霜芳齡

誓靡適暮齒終弗忘懿德耀高閭清風彌大邦哀榮一  
朝異縞素發道傍虛窗委斷織重壤燁幽釭高山上我  
我流水下湯湯瞻言歌衛風三歎我心降

題柏友亭

交道日淪喪結恩不結誠朝爲春華敷夕已秋葉零薄  
俗傷易遷使我慕清貞深居謝朋游嘉樹旅前庭影直  
靜相偶心通潛有聆霜霰依時至雨露互滋榮下根附  
旁薄上枝拂窈冥興言著歌詠伐木感嚶鳴德義古所  
敦切琢庶相成友已苟無益不如草木生

種木必種堅取友必取端汎交無完節常木有凋殘彬  
彬魏亭士古柏義所觀封植嗣前規斧斤違世患眾芳

或搖落修榦鬱桓桓舊本亦已固新枝日復蕃夏蔭交  
座隅秋影溢檐閒薰濡致馨德采服資妙顏不有後凋  
操誰茲同歲寒

題登瀛洲圖

龍姿御昌歷詞館萃羣賢對問日優暇更番時後先退  
集樂餘閒誰能徒食眠游藝亦云末寓情諒匪專十洲  
不可求瀛海以言傳遂令是中士望者稱若仙丹青孰  
是非翰墨互騰宣才難古所歎後者或求全

和虞公同李伯宗賦昱公四珠精舍

泠泠清澗流磊磊碧山岑巖棲遺紛競禪憩悅幽深雨  
過虛室寒寶氣發前林明月交珠樹微風來樂音圓明

攝諸境空觀明夙心嗟茲遠行客悵望結袵襟

淵明圖

淵明高世姿稟性良寡諧出山諒云偶忽去亦奚疑人  
生驅衣食微祿恆累之枉已旣非志在俗固多違萬鍾  
不足顧五斗奚以爲卓茲千載中作者與爲期

題麋架閣所藏故人新竹圖

參差蔭奇石磔礪連孤樹初籜旣從風新枝復承露瞻  
茲時物化感彼芳辰度故人思久要夙昔乖良晤山阮  
詎非倫求羊諒同趣虛心願自比從今至遲暮

九鷺圖

鮮鮮白鷺羽振振清江澨露草寒已衰風蘆近相蔽飛

鳴各自適離居亦有次雖愜江海情終懷雲霄志君子  
思有則畫者工取譬儀羽庶可希修潔誠所貴

羣雁圖

微茫洞庭野隱約瀟湘岸鴻雁將棲息飛鳴求其伴先  
集良未安後至淒欲斷使我懷弟兄因之中腸亂留連  
江海遠慘淡秋暉晏常恐隨天風高飛入雲漢

題袁宏泊渚圖

秋氣集空渚月彩汎微波夕坐起遙思中流聞歎歌移  
舟近相卽酌酒望銀河高懷世稀偶良會豈更多未知  
百歲下視此復如何

題袁安臥雪圖



積雪既填戶衝風或入衣空廬獨僵臥豈不念寒饑薄  
俗何足干固窮良自爲自非洛令賢誰能顧荆扉茲事  
已云往高風今絕稀

晉蘭刈蘭棘圖爲了上人題

樹蘭勿近棘剪棘或傷蘭惡木翦復生芳草樹不蕃空  
門一諸幻君子殊眾觀薰蕕戒同器玉石忌俱燔不見  
致芻人懷馨增永歎

題張仲衍書屋圖

茅屋閉柴荆度橋聞讀書風含萬谷動雲集兩厓虛松  
葉走山犬花源通夜漁世俗自多違林泉非見疏他時  
或相憶來就北山居

題雲崖圖

高崖含青空雲氣所出入  
細縕日千態嶄絕恆特立  
雨合龍挂低風迴鳥飛急  
寄言爲山者進簣庶可及

題張伯龍書屋圖

清江帶茅宇絕壁連松寺  
谿響漁未歸橋聲客應至  
數鴉林外落一犬庭陰睡  
終日對羣書焉知俗閒事

題墨竹

吾聞崑崙竹可截黃鍾管  
千尺雲外安數寸煙中斷  
時人拘兩目所見何自短  
撫卷方寂寥清風坐來滿

題畫石榴

漢使致石榴千秋見嘉實  
漿寒瑪瑙破枝重珊瑚  
屈憶

昔開大宛疑將薄西日丹青有微喻意豈貴遠物

題山水小景雜畫

晴煙翳高樹野水連幽草渾疑輞川業復似斜川鳥鷺  
下白波聞鶯嘒綠陰好安得買田廬相從是中老  
空村斷行迹深雪連昏暮慘淡旣平岡陂陀復行路時  
聞一樹折猶見羣鳥去中有映書人柴扉對何處  
江白雲稍歸山青樹如沐輕舟漁石渚獨騎經林麓野  
氣昏已明泉聲斷猶續坐憶汎湘時村西見茅屋  
雲煙狀幽絕正壑懷棲遯新雨松樹涼輕颿竹林晚閉  
門堆亂石曳杖行修阪寂寞垂釣翁扁舟去人遠  
雲歸山欲暝月出泉相映石影生夜寒松聲起僧定遙

疑露下立或發風中詠幽境何闐寥長廊罷鐘磬  
平湖寫山影遠嶼來花氣魚鳥終日閒琴書有時至風  
檣出彷彿雲木生迢遞對此獨逍遙誰能識幽意  
雲山不可極野水多相似古木生夏涼幽篁起秋思漁  
舟石下出歸騎山陰至中有隱君廬蒼茫何處是  
盤盤蒼山根泉出如素練含風靜復響觸石驚相濺竹  
迴秋氣來松涼夏陰轉山翁閱妙理獨立無人見  
野樹蔭輕舟晴波照層巘平橋昔未斷孤客來何晚坐  
使春思多應懷暮山遠□□□□□□□□□□□□□□□□

題墨梅

老樹亞晴空疏花帶寒野風流不自惜澹泊從人寫歲

晏孰能娛空山少來者

孤花何婉婉玉立含幽素短短時出橋疏疏或臨路坐  
疑檐下月半照牆西樹

...

...

...

...

...

...

...

...

...

...

...

傳與礪詩集卷之二

傅與礪詩集卷之三

七言長短句古詩

奉題仇工部壁閒古松圖歌

蒼松在山自奇古灌木翳之人不驚忽然圖向堂上壁  
滿坐歎息長風生交柯崛走森晝晦其下將疑鬼神會  
霧雨寒霏虎豹毛雷霆怒折蛟鼉背乃知巨筆老且神  
力幹造化雄千鈞皇天不天棟梁具后土潛回霜雪春  
爾松已爲人愛惜見爾爲爾生顏色山中豈無材木倚  
絕壁未逢匠石嗟何益

題衛知事廣衍倉西軒墨竹歌

吾聞渭川竹如簣大倉欲致那可得開眼睛煙落戶牖

透裳冰雪生胸臆愛之借問作者誰毋乃與竹同標格  
自是君懷足清致故須好事留真迹陰森雨氣發中林  
颯爽秋聲起前席微坡直具百畝意老榦真憑萬鈞力  
玄豹猶含隱霧章蒼龍已奮干霄翼火雲六月思遠避  
安得坐我林閒石待實誰憐彩鳳饑釣鰲未試長竿直  
爲君歌罷久歎息羣玉蕭蕭動高壁

猛虎行

長林瑟瑟多悲風猛獸引子戲林中白晝橫行動山谷  
周遭十里無麋鹿路暗樵夫畏獨歸行人愁向山家宿  
近山日日取牛羊更嚙居民橫路傍民要耕田給倉庾  
官家得知射殺汝



寄題岳陽蕭氏四亭

舍南舍北佳山水虛檐黛綠浮空起明月秋生坐榻前  
白雲暮落屏風裏微茫遠色帶晴湖造物經營趣獨殊  
世上徒傳摩詰畫胸中誰得輞川圖

右天開圖畫

山人住山塵鞅斷草色屢見流年換葉落長林雁過清  
花開雜樹鶯嘯亂秋去春來醉復醒常時玄鶴下青冥  
岳陽道士應相過千歲松根煮茯苓

右山閒四時

流泉涓涓出地底梢切行雲翻日光環山已歷千峰窈  
到海寧辭百折長波濤日夜相摧激戶牖憑高興何極

風雨冥冥聲合時蛟龍變化那得知

右百川偉觀

長松當檐擁高蓋翠色浮光照庭內天矯聲從霄漢回  
蒼茫氣與風雲會柴扉晝寂思共倚藜杖秋閑知獨對  
辛苦移根得雪霜江頭種柳三年大

右倚雲獨秀

墨蒲桃歌爲俞紹芳題

紹芳名述祖四明鄞人

大宛蒲桃連萬區貝上蒲桃員十丈宿昔仍聞植漢苑  
見之坐右神森爽露餘大寶垂堪摘煙際危藤引初上  
度海疑從博望槎入林恐倚曇霄杖流沙飄颻豈易致  
別館蕪廢今誰賞蕭蕭素壁走龍須風雨蜿蜒日應長

憶昨揮毫雲正愁炎天忽若對清秋  
玄珠滿把君能得  
綠酒千鍾不用求  
古來豪富誇蓄積  
肯貴翰墨相傳留  
君不見扶風孟氏子  
笑談一斛買涼州

賦得秋夜長送方叔高

叔高名積九江人

秋夜長長如歲長如歲  
尙可夜涼薄人不能寐  
羣雁各南翔  
一鳧尙北飛  
團團素明月  
流光照我衣  
當歌正激烈  
慷慨送將歸  
丈夫成名微亦足焉  
能終夜悲刺促

秋月皎皎夜何長  
念君客遊思故鄉  
當壚美人惜年芳  
遙夜起舞歌清商  
歌清商送急管爲君酌美酒  
請君勿辭滿  
夜長迢迢漏未終  
離思比之何時斷  
離思長夜猶短

混沌石行

九江方叔高得武侯八陣磧中小石於其處白質而黃章狀若雞子字曰

小混沌揭藝文爲作混沌公傳云

混沌以來不可數萬八千歲生盤古細縕乃在拳石閒  
光怪潛通落星渚來從魚腹人盡訝坐念武侯心獨苦  
八陣圖成泣鬼神三江右轉凋寒暑蒼波噴浸圓且堅  
雞子結成生理全久當化鳥非爲怪大未成羊亦可仙  
玉精隱月相照射金液流霞相繞纏輕清已判中黃外  
元氣猶涵太素前英雄事往惟存石天衡地軸今誰識  
江上常疑霧雨寒坐中歘恐風雷黑摩挲直如見溟滓  
位置豈肯同沙礫長路相將拂劍隨天陰勿使精靈得

奉題達兼善御史壁閒劉伯希所畫古木圖

遠樹含幽姿近樹亦古色水傍嘗見畫不得乃在君家  
中堂之素壁青林寂寞行人窈白澗微茫斷煙隔入門  
蕭蕭雲氣生落日便恐歸禽爭耳後颯爽寒風聲知君  
夜眠愁雨黑留客晝坐宜秋清劉侯學李成畫手稱獨  
步時見作古松盤屈百怪聚一作任形勢中林一枝直且良  
安得劉侯寫其趣一作安得揮毫縱奇氣

慈烏謠傲烏生子爲劉氏子作晉寧劉氏母王  
蚤寡育其子成人仕爲藝文監筦庫吏得祿以  
養其親士大夫皆歌詠之

慈烏慈烏阿母養汝時乃在劉氏庭樹閒喏爾烏子尙  
乳時安知阿母宛頸獨宿日夜畏汝生憂患喏爾烏母

自勞苦今汝逸雖有風雨巢壞阿母身蔽覆不使烏子  
寒啗爾烏子身已大高飛入上林苑使阿母端坐身受  
哺啗我天子至仁羅網不令及爾身爾一身更得食太  
倉粟阿母與爾朝食粟夕止舍啗彼烏生子何必八九  
雛阿母長饑不知彼烏子處啗爾慈烏爾母子慈且孝  
願爾生子如爾孝爾身何須復憂其後凡今之人各各  
有父母

送鄧朝陽歸赴分寧州杉市巡檢

男兒生當游八區焉能鬱鬱守坐隅往昔滯留湘中日  
我兄翱翔天子都先皇崇文坐垂拱平明西閣千官擁  
瓊島稱觴日月閒玉階奏賦星辰動後來執筆隨天官

纂述大典垂不刊書成入對紫微曙宴罷歸辭青瑣寒  
兄今得官三釜足借乘邏騎南山麓我家書欲寄將  
柴門迴映清江曲

朝陽余同里天歷初至京師嘗因天壽節獻萬歲山  
賦後以能書助修大典當得內郡校官借江西司警  
之職近家故也南山在寧州境修水之上杉市寧屬  
故及之

送危尊師奉香還龍虎山

蓬萊使人朝帝闕馭風上下何超忽青節春辭霧閣還  
紫簫夜送天香發山上蟠桃應著花五雲何處是仙家  
但祈下界多年穀長共羣仙飯熟麻

白紵詞

白紵白白如霜美人玉手親自浣製作春衣宜短長春  
衣成有時遠行歸無期願君著衣重愛惜風塵變白能  
爲黑

題太白玩月圖

明月出高樹上懸青天中下有萬頃之潏江揚波汎彩  
清若空江風吹人色淒凜此時對月誰能寢十千斗酒  
何足論舉杯直就花前飲花前飲酒無與儔酒酣意氣  
輕王侯仰招行雲不可得但見月與河漢俱西流仙人  
伐桂樹玉女倚瓊樓顧盼暫相悅棄去終莫留昨日已  
浩浩來日復悠悠人生如飛光及時不飲空白頭君不



見月中玉兔擣靈藥不能醫此萬古之閒愁何如盡醉  
江石上天地與我同虛舟長嘯六合閒浩然何所求

黃鵠山人歌爲某人壽

黃鵠之山仙者所遊上有萬里之雲氣下有千古之江  
流日月往來揚光於絕頂崔嵬崒嶺橫高秋山人隱其  
下奇氣與等侔時逢王子喬白日相邀留口授長生訣  
吹笙縵嶺頭玉京羣仙朝帝所合沓風雲會龍虎中有  
一人王子徒上帝命之司紫府長跪謁仙人引之凌九  
霞左攀琪樹枝右接蟠桃花逍遙佩明月出入太清家  
有時乘獬豸下界觸羣邪帝令司民命禍福無舛差坐  
調陰陽運帝車文昌六星示光華光華燿燿照地維鳳

皇麒麟班陸離仙人飄翩翠霓旗手把雲裾宴瑤池宴  
瑤池飲醪酒玉童東來獻長壽下顧黃鵠山蒼蒼年命  
與之同永久

送奎章閣廣成局副楊元成奉旨之徽州熟紙  
因道便過家錢唐二首

新安江水清見底水邊作紙明於水兔白霜殘曉月空  
鮫宮練出秋風起五雲高閣染宸章最憶吳牋照墨光  
明朝驛使江南去詔許千番貢玉堂

綠槐五月高雲冷行人辭闕瞻鄉井奎壁秋迴帝座深  
斗牛夜隔天河永君今銜命出江關卻到徽州幾日還  
天上應須朝絳節湖邊何得愛青山

憶昔行送雅琥正卿參書南歸參書居閒京師  
行中書調廣西選爲靜江同知比上其名中書  
正奏授高郵時廣西寇盜而參書母老卽移家  
歸武昌待次遂作此奉送兼問訊江漢故人

初名

雅古登天歷第  
御筆改雅琥

憶昔文皇御天歷知君已是青冥客寶氣經年動斗牛  
璇光徹夜通奎壁比來蹇剝人所歎况復貧病家多厄  
忽聞除書雙及門老親白髮生顏色秦郵近水足秔稻  
桂林只今多盜賊待次且食武昌魚攜家不過湘南驛  
王祥舊來驅別乘賈誼未久遭前席此時父老怨來遲  
他日攀轅會霑臆騏驥那愁九州大鳳皇早恨三山隔

秋浮江漢雲木清夜過淮河月波白新詩屢成知自誦  
遠道卽見何由得黃鶴樓南遇故人因君爲致長相憶

立春日對雪 乙亥

帝城東風作春雪千花墮地吹還滅雲氣微分五鳳樓  
日華稍動蒼龍闕天涯對節每思親況復愁中數見春  
坐憶高堂獻生菜朝來說著遠行人

古杉行題陳兵曹所藏李遵道畫靈隱道中二

杉圖

靈隱道中古杉樹上與雲霧相膠葛李侯一見爲寫眞  
霜雪蕭蕭起毫末此杉蒼茫幾百年鬼物扶持人所憐  
貞心豈容螻蟻蝕老榦或有蛟龍纏山林萬里那得致

見者皆驚棟梁器暗壁尋常度雨聲晴窗彷彿生秋氣  
吾聞大厦眾力持此杉誰能久棄之君不見道邊不材  
木擁腫百圍安所施

隴西節婦歌爲閩母田氏作

隴西節婦生何苦二十夫亡子方乳琴底愁聞黃鵠音  
鏡中畏見青鸞舞自從十八嫁良人年年離索怨征塵  
葉落嗚看隴西月花開坐憶劍南春劍南忽報消息至  
生死那知早相棄寒日秋明化石心悲風夜落崩城淚  
誓將埋玉歸同穴終擬遺珠照來世諺草萋萋種北堂  
柏舟渺渺臨東逝於今門戶有光輝八十紅顏世所稀  
郎君佐府紆朱紱年老辭官著綵衣當時哀苦痛欲絕

晚節尊榮忍能說寒織猶殘斷後機香巾未解來時結  
人閒萬事可勝悲腸斷江波日夜馳君不見會稽愚婦  
輕貧賤不待白頭生別離

奉題陳參議谿山四雅圖

陳公退食一事無開閣示我谿山圖晴林當晝發煙霧  
頃刻松陰生坐隅恍聞鳴琴動疏竹一亭宛在清谿曲  
樹下風聲出舸船石閒水影搖碁局隔谿高堂鬱森爽  
丈人避世嗟長往嗜書無論終日讀愛畫時更臨風賞  
可憐九老幽致同欲往從之不可通我貧何時見此屋  
悵望林壑生清風

題順元帥府都事楊君昭雪卷後

至大間夷寇野鵲劉弄兵鬼方津殺斃爲民害至白  
晝入城登元帥庭大呼狎視鎮兵若無人者時楊君  
爲幕白府僚發卒捕之獲其渠魁七人賊眾潰走南  
邊以寧事聞會執政有銜元帥者以專制論罪凡在  
府者坐之後八年朝廷亦知其枉命在坐咸復舊官  
屬關陝之變楊君適居蜀不得通今年始來京師因  
靖州劉從事持其邦人士所送贈文若詩爲言狀及  
其爲人才能遂共感激作憶昔行一首以贈之

憶昔南夷瞰羅鬼魑魅魍魎何爲爾奪馬朝驅大市中  
椎牛夜嘯長林裏公然入城欺守帥況論過邑殘居里  
府僚會謀飭將卒殺捕渠魁眾皆靡事聞執政議專制

忍使羣盜輕邊鄙明罰終能達帝聰復官更遣司軍紀  
幕中楊君西蜀彥宿昔同患今須起感時每欲淚霑膺  
論事猶聞血生齒寇盜風煙互騷屑朝廷爵祿思任使  
至尊日夜憂四方安得邊臣盡謀士

用王著作晉之見寄韻奉題其所寓聽竹軒

王家好種青琅玕四壁秋聲生夏寒朝回每獨風前立  
客至時同煙際看北窗數竿最幽勝滿耳蕭蕭客塵淨  
裁管休將學鳳鳴世間古曲無人聽

邯鄲行

邯鄲城頭下白日邯鄲市上風蕭瑟故壘空餘烏雀悲  
荒垣只見狐狸出何王墳墓對山阿尙憶諸侯爭戰多



趙客歸來重毛遂秦軍老去畏廉頗黃塵白草宮前道  
鬼火如鐙夜相照公子秋來不見歌美人月下那聞笑  
當時冠蓋激浮雲搗鐘考鼓宴青春只今惟有郵亭樹  
還送年年行路人

傷哉行

傷哉何傷哉出門聞天語掩袂不敢哀道傍行者但躑  
躑使我才腸爲之摧嗚呼上天生下民下民何多災玉  
龍駕若木奄忽復西迴吾聞女媧斷鬣立四極胡不使  
之萬古不動長崔嵬天高蒼蒼不可及下民號之空仰  
泣

廣西謠

傳言三  
廣西謠一何悲水泠泠山淒淒寧逢猺賊過莫逢官軍  
來猺賊尙可死官軍掠我妻與子

八十里山行

桂林之區猺賊雜處南有八十里之高山絕天繇延開  
險阻賊人倚之作巢砦劫掠經年勢還大官軍收捕費  
供給主將逡巡竟何待居民近山晝夜愁山下行人皆  
白頭况聞良家半爲賊官府貪橫仍誅求安得大聚邊  
頭兵甲鑄田器盡鋤高山作平地高山平猺賊斃

南屯老翁行

南屯老翁年七十官府征猺困供給大男送糧赴軍前  
次男守寨不得眠盜賊時時劫生口東鄰西舍日夜走

今朝喜見朝廷使持酒含悽說前事筋力雖微不敢休  
辛勤更備官軍至教兒應役莫逃亡縣男成長身日強  
但願明年盡殺賊耕種官田得兒力

泰字篇

元氣渾淪物之先至道周流充大圜洪覆六合完以堅  
曠劫不壞體自全真人乘清馭紫煙坐攝羣動觀化遷  
手持玉芝授至言恬澹無爲遊漆園大虛之室洞玄玄  
絳衣神君宅中間開闔兩扉日月旋列星離離耀櫺軒  
玉樞金籥固靈關物物不干妙自然崇臺中峙朝列仙  
內景含照洞無邊以虛爲牖靜爲垣子能居之神永安

雲莊行爲將作院使齧齧正德賦

房山山川蓄清美參錯田廬閒流水中有萬頃之白雲  
劃然變化開奇偉紛綸北貫居庸合縹渺西連太行起  
映日初緣赤縣來乘風忽被青冥裏雲莊主人起莊中  
亦如雲氣隨天風從龍已取應時運作雨猶資成歲功  
一朝進退卓然異眾人浮湛那得同乃知其善發天性  
況復所由承世忠身居富貴心何有馬上看雲數回首  
別墅思臨謝傅棊故園憶對陶公酒朝有舊臣人所賢  
卽今未得辭歸田頗聞醉後王摩詰乘興時能畫輞川

東谿行爲滁州萬戶楊俊卿作

東谿主者楊將軍少年領兵多樹勳心將富貴同流水  
身以承平住白雲聞道雲深是谿處扶桑直對門前路

青山左抱日光迴寒瀑西連雨聲注將軍臨谿樂詩酒  
沙鷗水鶴相親久螺贏經年綴鼓鼙蠟蝟盡日蒙刁斗  
白團羽扇小綸巾閒攜碁局過比鄰舟中有客時尋戴  
花底逢人非避秦人閒何所無正壑車馬憧憧走城郭  
紅葉空藏秋渚幽綠蘿自傍春巖落近者征西兵未休  
荒村窮谷多罹憂願移部曲隳殘寇卻向谿邊娛碧流

送袁慶遠赴潮州經歷

慶遠滄西人號果山

結廬清江山與鄰帝里留連冬復春南陌花開臨別酒  
東城柳發送行人行人直望潮陽館水驛過家風日暖  
天入滄溟裊纜長路經庾嶺題詩滿桑浦人家炊晚煙  
昌黎祠廟草芊芊候吏立當榕樹底烝徒到及荔枝前

府中文牘紛相積官長歡迎幕賓客  
鷗母秋還島霧清  
鱷魚夜徙谿雲黑遊子天涯興轉孤  
明朝相憶定何如  
上林無日無來雁會有鄉人寄帛書

樂城節婦詞

樂城婦郭氏子一生長閨門底少年嫁夫夫早死牀  
頭明鏡不復治落花深院鳥聲悲昔時山前哭夫處辛  
苦攜持葬姑去一身未亡兒女小兒今長大身益老大  
行行舟河水枯妾心皎皎終不渝縣官旌門人見好死  
別生離那可道

秋夜曲

草木搖落雁南飛文窗皎潔承月輝  
淒風入房露沾衣

紅顏含彩垂佩幃簪金鳴玉揚舞衣蘭釭謝耀照君闈  
遠行胡爲未言歸

七星硯子歌

吾聞飛星墮地時匿彩含光或爲石坯凝適與精氣會  
采斲猶疑鬼神惜君家文房七星硯坐令識者嗟難得  
天上還愁失白榆匣中歛見開玄壁尋常傳觀潤生手  
造次何忍汗以墨孤月秋懸列宿稀五雲夜墮三台折  
新晴試筆當廣廷頃刻煙霧生青冥忽憶前年渡河漢  
奉使不識天文經歸來空有支機石長使人聞知客星

送篤敬夫御史之南臺

布衣憂國人共嗤有時沈思坐終日不愁賢才進用盡

但恐吾道經綸屈忽聞故人拜御史走讀除書百憂失  
文氣寒依北極回德星夜徑中天出故人昔在天歷歲  
憶送君行把君袂瀟湘洞庭霜始清蓬萊弱水風能至  
董生對策遭英主韋相明經起高第丹閣終看集鳳皇  
青雲早見驅騏驥一生忠義心所留身至霜臺仍黑頭  
感君氣概重交分令我懷抱開羈愁繡衣南下動江海  
寶劍東行吹斗牛吾聞獬豸憎魑魅肯使鴟梟爲寇讎

天師張大立祈雪歌

至元二年冬不雪天子夙夜憂黎民宮庭擇日詔方士  
臺觀通天求百神留侯之孫住龍虎世領祠官列圭組  
鳧舄經時謁紫微鳳章半夜飛玄武皇天愛民祈可必



臘雪依微應三日望拜還聞在竹宮受釐忽報臨宣室  
天地杳默韜玄功賜子紛紜恩錫隆請和六氣輔元化  
常使九州歌歲豐

銅爵硯歌

鄴中文甄天下奇流傳爲硯亦堪悲月砌寒傾古臺暮  
雨犁耕出斷釵時荒涼火燒狐兔窟金棺別葬姦雄骨  
石麟暗刻魏春秋銅雀空題漢年月可憐此硯依浮世  
曾見高筵美人醉行迹猶霑舊鞵塵曉痕已滅新妝淚  
向來登踐日紛紛卽今磨洗見奇文題詩爲弔西陵樹  
地下曹瞞那得聞

禾簇簇題鄒福所藏勤耕圖

禾簇簇禾簇簇去年缺雨今年足人家耕種少得閒一  
春強半田中宿塘上水生禾欲齊春禽愛近落花曉出  
入無人看門戶野庭一任人來去有時耕罷亦長吟歸  
來不記入村深書編從挂牛角上詩卷閒留桑樹陰田  
家小心畏法令嘗願秋租得餘贖鄰翁昨日到城還聞  
說縣官有新政民間禁馬不禁牛有牛耕田君莫愁

中喜有後題羅天則鵲見尾圖云得子讖也

喜有後喜有後酌君酒爲君壽丹青百年知爲誰今人  
之心古人手是誰幻此靈鵲解人意坐令見者嗟神異  
鵲兮鵲兮爾何慧既不學海上精衛禽銜石填海恨海  
深又不學蜀中子規鳥空山夜嘯愁達曉梨花亂開春

日晴喳喳來蹋樹枝鳴風裏花開時見尾煙中樹合但  
聞聲闈中少婦聽倍喜卻憶春來郎遠行郎遠行兒在  
腹郎歸來兒在目想君得書歸有期正是闈中聞鵲時

題薩天錫歲寒圖

松樹青冥氣千丈野梅幽竹連蕭爽月下微風縞袂開  
屋前大雨蒼鱗長看君牆壁有此奇君更與此同霜姿  
乍聞清瀨瀉懸石忽若流雲生古陂我昔村居逼樵舍

下闕

寄浙省郎中泰不華兼善兼簡趙郎中

故人青春起高第才名豈是尋常者早將心事同稷契  
直以文章擬晁賈憶昨爲客初至燕傾蓋逢君五雲下

心好古書窮篆籀力研六義追風雅一朝乘輶當遠發  
卽恐地絕長相舍玉樹終期別後攀驪珠更擬來時把  
三時巡郡著繡衣幾處逢人避驄馬近聞被命佐華省  
錢塘名區最瀟灑百粵山浮白日閒七閩海入青天瀉  
幕下沉有趙郎中平生意氣君所同當時羣姦畏直論  
茲者二妙齊高風嗟我歸從日南國一官蹉跎今始得  
十度望君九斷腸誰能爲我生羽翼

題崔白飛鴉集雁圖

西風吹江湖水落沙石出汀州無人秋色遠落雁歸鴉  
滿斜日蒼然萬里聚尺綃粉墨變化生毛質羣噪晴翻  
洞庭野卑飛暝拂鮫人室翠藤古木分慘澹折葦枯荷

與蕭瑟亦知畫者當有情坐客傳觀反愁疾豈有人生  
不如鳥飛鳴各自安其匹君不見孔翠入君門局促金  
籠一生畢

烏全子爲晁安兒作後母害之劉長道者生之  
烏施施尾襪襪生時作巢養子雄樂雌一雌死一雌來  
三雛待母食一雛長獨饑彼母胡不仁子不雛母將奈  
何雛在樹母啄逐雛去樹百鳥利雛肉常恐身斃巢亦  
顛母雖愛二雛巢壞寧獨安忽有黃鵠從東來挾雛置  
樹間含哺以食教以言今日羽翼成黃鵠不言恩

武氏節孝篇武用妻蘇氏子名德政

孰不有婦武氏有婦貞且慈夫疾自刳股夫亡守空帷

志不可奪義不可虧命子有遺言千載爲母儀孰不有  
子蘇氏有子孝以順生時養母不違母母沒長思奉遺  
訓負土爲墳廣塋域東西築臺高百尺二泉出地蛇所  
導神物冥冥寸心格泉廢尙可發土夷尙可增吁嗟蘇  
氏子同傳身死有名人鮮能

遠將歸

遠將歸恨歸晚通州河頭有船雇行人將歸不言遠人  
家生子少離鄉一生長在父母傍自憐出入無年月北  
走京師南走越他人富貴輕貧賤一日金多棄鄉縣小  
官祿薄何足爲得及父母康強時說著還家客心喜此  
身雖貧亦不恥

覆舟歎

吳中富兒揚州客 一生射利多金帛 去年販茶溢江口  
今年載米黃河北 遠行香火倚神明 從來風水少遭驚  
近日船行御河裏 順流日日南風喜 笑人上水風打頭  
豈擬自家船入水 前船各自向前行 後者還來逢哭聲  
妻子家中未知死 同侶將書報鄉里 道傍歎者獨何爲  
昨日寧聞今日悲 豈不見他平地上 風波頃刻少人知

書陽羅堡

微雨蕭蕭溼行李 馬頭卽見長江水 煙浦明侵白鳥邊  
風帆亂入青天裏 故人南北久離居 況復經年無素書  
明日重吟漢陽樹 何須不食武昌魚

雙劍圖歌

莫邪于將古神劍得水化作雙龍翔斗閒寶氣入江滅  
波裏金鱗翻日光道人筆鋒如劍利亦能化龍致神異  
黑風颯颯濤欲立白日陰陰雨將至忽然逢之不敢窺  
爪甲雲氣常淋漓便愁中夜雷霆怒兩龍乘雲盡飛去

金人擊鞠圖

古來北方善騎射材力往往矜豪雄吾觀金人擊鞠圖  
意氣已欲橫上中黃旗鷗羽指天黑繡柱龍鱗掀日紅  
鳴鞭縱轡捷一發左迴右折如旋風流星迸亂拂衣裏  
飛電翕忽生馬駿極知此藝較輕矯馳騁亦似觀成功  
後來脣齒不自惜縱習武勇終亡國當時得失爭一丸



百歲安危復何益

題篤御史海鵲圖

空庭海鵲誰所狀，海氣初高鵲神王。  
雲腳西騰弱水涯，潮頭東出飛霞上。  
此時扶桑色始分，下視百鷲空其羣。  
日中金烏側相避，籬下凡禽何足論。

醉仙圖

吾聞真人絕嗜欲，酒有何好仙好之。  
八人坐飲崖樹下，大醉千日無醒時。  
夢中冥冥浩劫始，世人不知其所以。  
蒼梧洞庭孤月生，閨風玄圃鮮颿起。  
蜺鶴翥無復顧，顛倒煙霞在冠屨。  
壺中盡是長生日，物外無非共游處。  
醒時所執醉若遺，萬事紛紜何足持。  
嗚呼仙道或在酒。

於我不飲生何有

武夷山雨圖懷杜徵君

武夷山中春浩浩疾風滿地翻  
瑤草雲來九曲川欲平  
雨發千峰樹如埽谷口車輪不能辨  
水邊茆屋終相保  
可憐卿相多黑頭空谷斯人著書老

孫伯大山居圖

洞庭之區水所瀦波濤四時春  
太虛故人卜築乃厭此  
因遣好事圖山居昨日開圖見山色  
坐中煙雲生頃刻  
峭石雄爭崑嶽青飛湍怒截天河白  
衡門雞犬仙源裏  
野徑山橋宛相似埽花可以坐白雲  
采藥誰能記流水  
知君愛山不在山畫者所見非人閒  
竹陰對客自吟嘯

松下聞泉時往還我坐食貧苦奔走石田茅屋今安有  
招隱空懷小山桂讀書未種先生柳看君此志眞絕塵  
只今功名始發身會須買田增築室遲莫有意來相親

伯大山水圖

齋居胡爲見雲壑白日虛嵐滿秋幌河水深蟠地底回  
層崖險歷空中上蒼茫不知開闢始咫尺須論數千丈  
林端遠岫微有無巖畔精藍鬱蕭爽雜樹懸蘿拂輕黛  
寒松覆谷含清響仙源或在人閒世洞口孤舟欲長往  
嗟我平生最漂泊中年萬事何鞅掌憶昨征行多所經  
至今絕境懷幽想雷霆半夜山忽至風雨三春石應長  
對坐聊歌隱士芝無因一試仙人杖

傳言三  
方少府雲山圖

岳陽方君嗜山水妙墨千金不論價好事林生偶相得  
乘輿能爲米家畫雲壑幽森溼翠虛風林颯爽宜朱夏  
石橋對面寒泉落茆屋無人午煙罷知君家居洞庭左  
亦有別築東山下鄉者入侍白鶴宮終日奔隨六龍駕  
谷中白雲晝自滿石上青松歲當化爲憐束駕事趨謁  
常擬還山事耕稼我亦平生貪勝境誰其未老身閒暇  
就君買山安得錢願乞長縑埽嵩華

送蒙古學正楊茂先歸

古來篆籀久不作聖代同文變新學近者秦書廢舊傳  
諸生漢詁求先覺岳陽官舍冷於秋微祿淹人歲月流

已聞給告還鄉縣明日風帆失郡樓

題宋道震皇都春色圖

客居棲霞山自號棲霞子平生好詩復好畫詩興蒼茫  
畫圖裏昨日山中開酒壺酒酣聽我說皇都坐聞皇都  
好春色引至東家觀古圖東家古圖長一匹數字猶題  
馬麟筆上有宋皇飛白之草書舞鳳回鸞弄雲日此卷  
臨摹用心苦猶恨生絹不如古歛從坐上見平蕪便恐  
征衫溼微雨雨中如聞人語聲彷彿謂是長安城水波  
已暖浴歸雁宮柳初長嘯早鶯聞闔霏微五雲起樓臺  
隱約千花底是中冠蓋多貴人想見行車若流水豈無  
禮樂成教化亦有文章侍閒暇山人胡爲獨長往或問

長安指圖畫君不見古來出處稱達生山林朝市各有  
名百年適意無不樂聊醉春風歌太平

題章存誠十三馬圖

韓幹畫馬天下聞筆力遠到曹將軍忽從座右見神駿  
落日蕭蕭愁暮雲雄姿利氣閒且逸霧鬣風鬣十三匹  
神龍變化未可知天駟光芒有時失去年刷馬喧都鄙  
紛紛殺馬輸馬耳騏驎遙依沙漠寒駑駘盡向風塵死  
江南近來一匹無君家乃得存此圖便當持獻穆天子  
上下八駿同馳驅

題劉煥宗明皇四駿圖

明皇昔時愛名馬天廐所育皆神龍今君畫圖有四匹

無乃神駿來九重  
圉人控御愁閭闔  
千里長安草蕭颯  
沙苑晝疑雲霧昏  
渥洼夜恐風雷合  
因思蜀棧鑾輿苦  
那見唐宮教坊舞  
老驥飄搖棄長道  
美人寂寞歸黃土  
開元舊事誰復陳  
獨使此馬傳其真  
今人觀畫心所忽  
古者千金市駿骨

梧皋行爲滄張會慶賦

玉山桐林君故鄉  
聞有梧樹參天長  
高枝蒼茫會風雨  
老榦偃蹇殊陰陽  
江皋顛氣接飛翠  
屋下春泉流細香  
敬侯種木晚爲用  
少陵移居恆不忘  
只今城中池水側  
還植遺根志先德  
鸞鳳棲枝漸長翎  
蛟龍伏窾終生翼  
飛英拂硯春常滿  
落葉當庭晚逾積  
避暑時開背日窗

聽風或坐臨流石蘭臺御史立圃仙高風勁節時所賢  
直將文章著始末坐使泉石生光妍昨者尋君坐梧下  
爲君誦詩神爽然他時清廟製琴瑟君有長材寧棄捐

劉宗海山水歌

吾郡山水邑材藝皆絕倫昔時稚川善遊戲妙墨往往  
追前人後之作者非一士劉生妙年下筆新意營慘淡  
竊元氣功接虛無通鬼神一生精勤嗜奇古十年不見  
今楚楚忽然遺我四老圖白日雲煙起窗戶頭上松花  
坐處落手中芝草飢時咀此翁眉骨非世人蹤迹何因  
到城府誰依澗石開茆屋亦遣疏花映修竹樵斧時衝  
白鹿歸漁舟獨繫青楓宿嗟余奔走貪長道見畫幽人



媿塵俗近時詔下徵隱淪茲土胡爲置空谷

牧牛去題袁慶遠經歷所藏畫

牧牛去千山復萬山上山日出愁起晚下山日入苦行  
難手中鷓鴣牛伴侶養來多日能人語縱牛不牽繩自  
垂聽他行食毋苦之欲歸尙憂牛不飽更近前谿多水  
草但願年年牛盡肥主翁足食身足衣農家養牛國所  
賴惡少城中殺牛賣

贈相士潘碧山

安成碧山子所居以色自取夫何如眼同秋水照絕壁  
心與浮雲行翠虛古來善相稱許負子有藏書服膺久  
直言往往驚四座乃使世人畏其口嗚呼萬物同一氣

妍醜於人豈天意蜂目誰知不可親虎頭自信終能貴  
近者遇子岳陽城知我貧薄謂我清顏回屢空吾豈敢  
猗頓多貲非所榮潘生潘生子非佞我生久已安徽命  
君不見松柏空自材歲晏蕭蕭雪霜盛

贈醫士謝茂德

滄江遠近皆名山仙翁羽客多往還玉田輝輝生寶氣  
丹竈往往留人間謝君逢之得其道家積羣書日探討  
上池飲水能知物東海得方還卻老早時玉柱照庭階  
世俗紛華志寡諧幾回酒到能傾座何處詩成不放懷  
古來醫術資造化內足看君貌閒暇市上懸壺豈近名  
城中得藥應同價種來林杏日青青猛虎環行眾不驚

豈無詔使來弘景亦有詞人傳宋清近者江城喜邂逅  
人生那得長相就丹砂見說可輕身遲子南行覓句漏

題胡志同所藏牧牛圖

志同名秦豫章人善書

達官肥馬飽欲死農家畜牛恆苦饑春田百畝用牛力  
出入飼之須以時平林蒼蒼雨如霧散牧前坡自知路  
今年作苦牛勿辭去歲凶荒闕王賦

題香室僧所藏簡天碧松檜圖

孤松直立苔滿身皮骨老作蒼龍鱗墨池得水怒穿壁  
屋上垂髯寒近人傍有雙檜左紋皺短蛟下蹲不敢伸  
神靈變化或有日雷電時時撼香室

牧牛圖歌

并敘

牧牛圖者袁氏之族送其經歷君赴潮陽而作也圖

有竹木水草其間一牛食且飽由由然弛其繩以憩

牧者弄禽於其側而各自得焉蓋民之就牧者有類

是牛善養之而不害焉則可終歲食其力矣經歷君

既去潮而歸余始獲觀圖於其第且聞潮民多德君

者圖果有輔於是行哉請作歌以題其後後至元四

年十月某再拜

我生田閒食牛力牛爲民命古所惜漢相行逢躬自問

齊王坐見心先感看君此圖誰所畫牛旁牧者何閒暇

哺禽獨坐芳草中歸徑應過竹林下牛饑或食飽或眠

養之勿害天者全服箱可以致遠道力穡由來知有年

吾聞長民如此牧養民得肥國當足君不見去年東海  
頭家家賣刀買黃犢

傅與礪詩集卷之三

傅與礪詩集卷之四

五言律詩

發武昌留別諸友

客子南來久京華北望遙交遊驚遠別文物慶清朝  
江漢春先動幽燕雪漸消芳年各努力流歲不相饒

江州社日阻風

社日長爲客行人總念羣溢江春過雨廬阜晚生雲  
淥酒治顰飲清弦送別聞風檣未得動堅坐且論文

大霧過安慶

水郭浮鮫室雲帆度客星江空連海白山遠入淮青  
訪古聊須到乘流未可停遙疑天柱曉風霧颯精靈

呂梁洪

巨石中流伏盤渦盡日旋善游因土俗近住有人煙陰  
或過三峽深疑及九淵輕舟脫魚腹錦纜得徐牽

下邳懷留侯

豪傑關休運乾坤屬遠猷自須成漢業豈獨報韓仇黃  
石嗟長往青山感昔遊同時多草莽事定覓王侯

對雨

到京餘二月聽雨獨今朝暝壓高城暗涼通積水遙猶  
宜深潤澤已足淨塵囂萬里甘爲客謳歌樂聖朝

七夕

耿耿玉京夜迢迢銀漢流影斜烏鵲樹光隱鳳皇樓雲



錦虛張月星房冷閉秋遙憐天帝子辛苦會牽牛  
八月十四夜聞雷聞衣帳器且何憫羣  
京華萬里客已念久離羣月幸中秋見雷驚靜夜聞奔  
騰迴朔野黯澹帶南雲百感西風裏星河子細分

中秋有感

萬里中秋月孤齋病客心庭闈兼喜懼書問隔浮沈地  
出西江永天旋北極深蒼茫家國意搔首獨長吟  
今夜霓裳樂宮中遂不聞乾坤劃慘淡河漢錯繽紛鸞  
背霏寒霧龍髯溼斷雲巡遊多近侍宗社倚元勳  
日夜瞻鸞駕生靈係聖躬都門一騎至血淚萬行紅桂  
月虛秋殿梧雲冷暮宮孤臣重北望掩袖立西風

翠華遊幸地，悵望感清塵。  
灑竹唳宮女，持弓泣野臣。  
金盤殘月露，玉座倚星辰。  
獨有龍鸞氣，長令草木春。

海子上

獨步金河上，遙看碧海隅。  
橋疑通月窟，船或到方壺。  
蜃室寒休杼，龍宮夜出珠。  
浮槎八月晚，應念客星孤。

卽事

目斷虞淵日，心傷魏闕秋。  
霍光元在漢，周勃固安劉。  
廟社多佳氣，公卿足遠猷。  
辰居終不改，羈旅莫深憂。

未有龍庭使，猶嚴虎衛兵。  
雲山秋塞遠，星月夜樓明。  
逆旅多防盜，遷居競入城。  
竊聞定神器，且可慰羣情。

聞有西宮使，還從北極來。  
日浮三島動，天抱五陵回。  
羣

志安中土繁星總上台深知社稷計須仗棟梁材

客舍

清商忽已動大暑欲全蘇竹響秋聲合松涼雨氣俱  
蟬依木靜蒼隼入雲孤畫扇寧忘汝祇傷節候殊  
詰陳宗道酒不至淹高劉諸公坐

酒許今晨至鐙從昨夜花邊人聽繫馬留客過棲鴉高  
適邀同至劉伶興轉賒不成投轄飲悵望隔風沙

賦得天際舟送兵部張孟功治河

日下行人發春辰去鷁催纜侵斜月解帆向斷雲開度  
鳥窺詩卷垂虹映酒杯尋源不可盡奉使幾時回

幽居卽事

夏木陰森合晴窗  
隱映開青禽  
翻露起紫鴿  
上雲回酒  
自鄰人送書  
因過客裁非  
關傲朝士  
直畏犯炎埃  
地僻連高樹  
庭虛集晚煙  
烏銜朱果落  
蟲曳碧絲懸  
扣戶鳴空盜  
開渠得古錢  
深慚窮巷客  
時枉故人牋

詠大樹答靳御史

大樹高風集  
驚潮四面來  
輪囷蟠厚地  
蕭瑟撼平臺  
雨暗蛟龍出  
天清鸛鶴回  
明堂須重負  
歲晚見奇材  
造化涵滋息  
神靈會渺茫  
色分羣木秀  
陰覆數家涼  
白晝鳴風雨  
玄冬度雪霜  
因知兔樵采  
故解拂雲長

送別汪仲罕赴處州麗水簿

括蒼晴樹裹  
遠色正氛氲  
江白連滄海  
山青入縉雲  
俱

傳習主簿兼似鮑參軍縣路多行客看詩定覺君

夜宿揭監丞齋館

旅舍塵都滿齋居意自幽花時晴獨往樹底暮相留詩  
許家僮學書從坐客求何因謝拘束來往屋東頭

山東王僉事君實數因書問訊以詩代答三首

都門相送罷千里只馳情寄雁經時到乘驄累月行春  
浮海岱闊風入泗沂清遙憶題詩處花開亂曉鶯  
聞道輶車出觀風處處臨汶流春雨淨梁甫夕煙沈書  
到能相問詩成想獨吟京華萬里客牢落損鄉心  
君家瓊樹好齋館舊相輝客至看皆惜春來見亦稀遲  
遲數字往悄悄寸心違無限臨風意何時把繡衣

送金華王琴士還山

年少金華客囊琴暫出山忽聞春水滿徑逐暮雲還三  
洞飄玄鶴雙谿下白鷗應尋牧羊子時過綠蘿關

寒江獨釣圖

歲暮漁竿客天寒向水雲孤舟清汎汎雙鬢白紛紛雪  
樹微茫見風篁縹緲聞王車如出獵何處定逢君

次孫伯剛鶴雛詩韻二首

弱羽爲人養卑棲每自歸步苔依坐石窺竹映開扉絕  
島秋雲迴空庭夕露微紛紛野田雀終日稻梁肥  
青田伏始出華屋到如歸水立風行沼庭棲月入扉已  
含仙氣足猶混羽蟲微寥廓終高去軒墀豈自肥

題畫扇

絕境羣峰合深居積水蟠俗人來已少山客見猶難朱  
閣憑風迴青林蓄雨寒此中宜野服何事欲朝冠

挽蘇郎中

蚤歲攻鉛槧長材異斗筭如何違畫省卽復返青郊朝  
士傷任隗鄉人慕薛包新城風樹晚行客淚痕交  
時世事多違乾坤露易晞斯人嗟已遠令子足相輝白  
日明珠樹青雲起繡衣能令墓前石終古照山扉

得舍弟書有喜

忽有鄉關客能傳舍弟書披衣喜不定倒屣問何如竹  
菴新容馬花谿夜得魚吾親足自慰鄰舍總安居

和雨中桃

爛漫多臨水，霏微亂塞蹊。  
燕輕霑葉喜，鶯滿坐枝低。  
歌袖歸時溼，行舟望處迷。  
夜聞春漲發，因憶武陵谿。

中秋分題賦廣寒殿

月殿懸銀榜，雲階倚玉梯。  
沈寥天上出，回合霧中迷。  
御氣通黃道，仙音合白霓。  
行人不敢近，桂樹長皆齊。

奉和揭監丞立春病中之作

京華頻立春，年老更迎新。  
汗竹從官事，儲稜養病身。  
乾坤萬化出，日月四時均。  
小閣長吟裏，清詩獨過人。  
相思梅蕊春，復見柳條新。  
霜雪頻過眼，雲霄各置身。  
感時懷子美，違俗憶靈均。  
肺疾今何似，朝來未見人。



近日

近日人皆棄方春客未還憶尋雲外跡吟看雨餘山庭  
草通行屐檐花對掩關蕭然坐離索此物慰羈顏  
獨客書空坐驚塵過眼飛亦知窮巷窈能使故人稀雪  
樹晴猶溼春苗暖漸肥風光歷庭戶多謝不相違

揭監丞枉和仍韻奉謝

苑樹鶯初亂江城雁欲還春愁兼獨坐暮色更千山風  
雨蛟龍宅星辰虎豹關年華將世故不用損朱顏  
城闕春風起樓臺霧雨飛雜花移欲徧幽樹種仍稀水  
鳥時時狎林鳥箇箇肥獨憐生事拙常與世情違

寄題余泰亨隱居

聞說幽棲處遙連郁木天  
徑開移竹地渠引灌花泉  
坐客留傾釀鄰人訪草玄  
京華遠遊子那得其盤旋

挽徐希韓

浦城人性好竹號筠山

少日遭離亂經年葺喪亡  
吟詩自可老好竹未能忘  
學舍餘春雨封土對夕陽  
傳經仍不泯遺澤故應長

挽徐春山

浦城人葬巖嶺

道路干戈後田園積累餘  
族闕年歉粟兒課夜分書  
巖樹成新冢山花落故居  
欲尋高士傳潛德在鄉閭

和王著作曉起偶成

宿雨過前林微風泛客襟  
螳沾槐下履蛛挂竹閒  
琴同巷常疑遠過門轉覺  
深知君揮玉麈詩罷更長吟

盧溝橋

古道曠秋色平橋臥夕陽水聲西下急山氣北來長數  
騎凌空闊山煙入渺茫人傳耕種地宿昔戰爭場

拒馬河

落日蒼茫裏秋風慷慨多燕雲餘古色易水尙寒波岸  
絕船通馬沙交路入河行人悲舊事含憤說荆軻

薩天錫畫屏

入坐聞流水開屏見遠山路通煙樹窈窕對野橋閒拄  
杖晴俱出漁舟暝獨還祇慚萬里客塵土汗朱顏  
娟娟幽竹好箇箇倚天長白日含煙雨清秋動雪霜渾  
疑過雲夢猶憶對瀟湘何日開三徑吹笙引鳳皇

延津渡河

驛路南征遠河津曉渡遲風霆劃簸蕩雲日互參差鳴  
鷓中流急懸帆上泚遲交州卻回日應及水清時

金竹道中書題桃花驛

征南萬里使行道畏蹉跎平壤踰淮少青山入楚多田  
依深谷轉路迫斷厓過後夜南樓月羈離奈爾何

對雨

飛雨飄颻至庭樹發餘榮隨雲縱度閣從風亂入楹依  
微方霧密羃歷配絲輕繁思良難理虛襟坐復盈

道傍松

鬱鬱羣松裏蕭蕭數騎行色愁侵帽碧寒畏入衣清遠

霧看時合微風聽處生棟梁須汝在來往莫相輕

石塘驛

道路清秋暮林巒白晝昏入松雲氣滿傍竹雨聲繁信  
馬知前驛聞雞識近村偶然逢水石真使慕田園

蒲圻道

蕭瑟行松竹蜿蜒出薜蘿地臨江北重水近岳陽多赤  
壁殘雲去青山宿雨過登高望不極懷古意如何

港口曉行

蚤起星猶在前行路稍分人家隔樹見山鳥過橋聞澗  
響多於雨林昏半是雲曉逢力田者媿爾一生勤

臨湘

宿雨愁泥滑長途畏日斜黃歸幽徑犢青聚古祠鴉野  
屋時依竹山園各種茶巴陵看漸近遙識故人家

平江道中

洞庭南去路暮阜翠峻嶒走馬千峰過哦詩萬谷鷹竹  
深圍亂棘松老落寒藤明日長沙道梅花發未曾

柳先生祠

江抱零陵郡山藏鈿鉞潭古人如水去祠樹與天參述  
作籠諸子風騷迫二南後來竊時譽吾輩得無慚

才大常爲累居深久自寒蟲蛇霑翰墨魚鳥識衣冠息  
壤風煙古愚谿月露寒經過懷故迹繫馬重盤桓

桂林

桂林南望遠山路與雲連淺水清涵石攢峰亂刺天干  
戈仍歲月瘴癘接風煙蠻寇何能定邊氓亦可憐

賓州

過嶺冬猶熱緣山夜未寧樹殘兵後赭草發燒餘青西  
寇迷仙霧南人候使星民居日稀少唯見短長亭

仙弈山

絕壁青天裏危亭綠樹中雲封丹竈冷日照石枰空五  
嶺塵猶暗三山路豈通黎民憂盜賊何處覓仙翁

大小石壘

嶄絕山如削崎嶇路欲荒竹繁兼霧暗藤落與風長鳴  
鳥時相近垂蛻巧自藏只疑人事隔隨處藥苗香

臘日入安南  
冬入安南國雲迎使者輶郡聞秦日寅柱想漢時標江路篁猶籜山田稻始苗皇恩涵遠邇行役不辭遙

憑高

世祖初開業安南早貢琛國蟠蝸角小地接犬牙深漢節猶頻入蠻兵莫見侵數州須拯恤萬感寄登臨

陀覽驛

日月低銅柱雲霄下璽書山通漢使道田繞馬人居文字雕題後衣裳斷髮餘檳榔雜雞黍相迓滿郊墟

將歸

道路南馳遠山河北望深班超晚投筆楊震夜辭金事



往徒勞問詩成只自吟背人閑倚柱誰識此時心

答別龍州蕭從事韶

北極絲綸下南陲政化通靈槎浮度斗瘴草偃隨風殊  
俗難爲別清談喜屢同馳驅不可住心切大明宮  
使節明金虎腰弓偃畫蛇蠻夷趨號令原隰見光華邊  
樹猶含綠江梅久放花憶君依幕府何日定還家

還聞柳州破道阻將泝江

交趾方通使賓州忽被圍還聞山路塞徑就水程歸上  
府空金盃前軍老鐵衣誰能平政化不事總戎機

梧州嘉魚亭

舟楫回沙驛旌旗駐郡亭江通五筦白天落九疑青此

日瞻雲氣誰家見  
客星軍須晝夜急  
寇盜幾時寧

崇仁峽元日思親

野宿逢新歲  
鄉書隔故園  
樹閒深倚櫂  
沙際迴開樽  
水影搖江獺  
巖聲應峽  
媛高堂鶴  
髮在萬里  
憶兒孫

別靜江文學諸公

乍見先愁去  
將行未忍分  
字期歸後寄  
歌畏別時聞  
驛樹過春雨  
江船隔夜雲  
驅馳念吾弟  
羽翼待諸君

和智禮部早發興安

早發興安道人瞻  
奉使槎雨來鳴  
近樹雲去落誰  
家解纜眠看竹  
哦詩坐煮茶  
歸程足幽意  
莫向市朝誇

浯谿

艤櫂依江岸尋橋過寺門竹深題字滿苔古刻文昏石  
色兼雲冷谿聲雜雨喧浯亭正何處爲覓漫郎孫

石鏡

方石開玄鑿寒輝截古銅映天渾欲迴含物坐疑空雲  
影無時度江光盡日通往來多自照妍醜莫相蒙

衡湘驛

烽火連諸郡旌旗轉百蠻野鶯先客至江雁及春還吳  
楚青天迴瀟湘白日閑登臨慰懷抱況復近鄉關

長沙見嚴親

遊子方春至嚴親盡日憐別來憂道路喜定問山川百  
粵元過嶺三湘總入天歸朝誠努力江上莫留連

金陵晚眺

金陵古形勝，晚望思迢遙。  
白日餘孤塔，青山見六朝。  
燕迷花底巷，鴉散柳陰橋。  
城下秦淮水，年年自落潮。

沛縣

縣路迷青草，行人蔭綠楊。  
時逢沛父老，能說漢君王。  
芒碭來秋氣，彭城送夕陽。  
憑高發慷慨，遠色正蒼蒼。

六月二十八日至京

使節違雙闕，天書下百蠻。  
雨蒸歸日路，雲合去時山。  
嶺表兵猶動，灤陽駕未還。  
安邊數策在，不得犯龍顏。

中秋同王叔善諸公分韻得中書字

皓月開良夜，清飈洗太空。  
氣浮銀闕動，光與玉壺通。  
霧

露分毫末河山得鏡中寂寥今夕會歡喜故人同  
城闕臨秋迴庭軒抱月虛桂枝涼可把桐葉淨堪書會  
合驚時序飄零憶里閤壺觴聊共引文字足相於

題陳大禧山水

古木風煙底遙山霧露餘野船依渡小村舍隔林虛路  
暗疑聞犬江清或見魚行人向何處應就白雲居

賦贈秋海樓誕

長天盡碧海遠色赴高樓月湧層波夜風迴絕島秋鉤  
簾逢鶴度倚柱見龍遊何日臨空闊從君望十洲

胡廷英箕山別業

高年餘菊水別業在箕山野鶴行相逐谿雲出自還樹

陰迎客健花下引孫閒游子京塵底聞風欲汗顏

酬黎別駕

遠道勤相憶明時媿不才偶乘天藻出親到越裳來離  
恨留詩卷登臨罷酒杯尺書非敢愛南雁或遲回

酬景德載

迂闊長憂世羈離久任天春歸萬里別臘盡一書傳江  
漢謳歌底瀟湘盜賊前相思未卽見眞媿德公賢

和王申伯寄子伯昌叔善

聞有閩中使遙憐闕下寒客袍裝恐薄賓館住宜安天  
廡千金足霜空萬里翰丁寧重遠業留簡後來觀  
尺素題封遠驪珠滿把寒長吟中夜起清夢幾時安霜

雪驚華髮風塵惜彩翰王家子弟好吾輩得相觀  
骨肉拘遊宦田園隔舊鄉竹聞刪後美松見種來蒼著  
述工何用驅馳苦備嘗承家不可墜季子最相望  
一老淹閩海三年憶帝鄉珠非照赤壁是禮天蒼文  
物歸朝覲聲詩託禘嘗周南不必恨有子慰深望

挽括蒼姚君衛

南宋傾危日東園隱逸年芝雲瀑泉外松月爛柯前自  
決生營葬人疑坐得仙猶聞化去日能寫示兒篇  
處士樵歌遠空山宰木寒田生晚傳易陶令早辭官白  
日開琪樹青天下玉棺看君真不死文彩映芝蘭

挽李森高夫婦

厚德鄉評在高情世事違孟光能共隱蕭史不同歸夜  
雨悲懸榻秋風憶斷機承家足文彩同穴有光輝

挽劉侍御

臺省思考舊朝廷失老成遂悲劉寔死猶擬謝安榮星  
落長沙白霜留建業清湘山夜來月還照淚縱橫

京師守歲

日月催時序乾坤隔晦明殘年萬里夢今夕幾人情久  
客煩朋友雙親倚弟兄深慚須薄祿不得謝浮名

次黃次舉

尋君已出俗久立向空庭把袂驚相得開樽媿獨醒雪  
餘深樹白山憶故園青未有同歸日哦詩且共聽



蚤歲違鄉里終年忘闕庭久同今日俗敢謂古人醒奉  
使心常赤逢人眼倍青紀行多近事愁思不堪聽

送羅憲使

雙闕除書下三山繡使來荔枝迎馬拆茉莉近人開輕  
箠行時把單衣上日裁不須愁溼熱冰雪滿烏臺  
使節安邦郡輅車出帝京星連百粵動風過七閩清財  
賦東南入瘡痍日夜生到官頻訪問常使慰羣情

發通州

燕騎經旬發吳船此日行樹知風起色帆識雨來聲驟  
轉長林暗斜分絕塞明河流今夜滿無復滯歸程

水村

野樹籠蔥合官橋屈曲通入天迷遠近看日得西東酒  
旆青搖水漁舂白映空時還問村落何必似城中

河西務  
驛路通畿甸廩倉俯漕河騎瞻西日去帆聽北風過燕  
薊舟車會江淮貢賦多近聞愁米價素食定如何

直沽口  
遠漕通諸島深流會兩河鳥依沙樹少魚傍海潮多轉  
粟春秋入行舟日夜過兵民雜居久一半解吳歌  
海戍沙爲堡人家葦織簾使催通漕米兵捕入京鹽蟹  
憶霜時賤蚊愁夏夜添歸人倚船坐閒愛草織織

五月二日清州

舟行旦復暮愁坐惜離羣斜日看帆影微風愛水紋鄉  
心增渺渺節物漸紛紛何處榴花色如今似舞裙

長蘆

水國常含鹵沙場業者煮鹽轉輸分使出征權置官監橋  
壞仍通市船來總落帆依依道傍柳無那拂征衫

秦郵

縹緲平湖白微茫遠樹青田分高下水道俯短長亭鳧  
鴨煙中亂魚鰕雨裏腥秦郵看漸近城郭記曾經

湖中方洲卽景

野屋垂楊裏方洲積水回船通菰葉過門對藕花開豈  
是嫌城府眞疑斷往來居人惜未學詩句不能裁

安慶

驛路通淮甸歸人及皖城山因天柱起江赴海門傾孤  
塔凌風迴危樓近水明舟中頻悵望猶憶去時程

初歸

遠道趨鄉國中宵夢弟兄松篁數里見桑柘十年成慈  
母驚相問鄰兒笑共迎無錢未足恨骨肉慰離情

送渝羅克一爲李太守之金陵市書

泮水諸侯學名山太史書萬籤懸日亂層閣仁雲虛發  
帑增收蓄升堂備卷舒知君遠行役不敢獨懷居  
銀漢通秋使金陵入曉行人稱蜀太守士得魯諸生畫  
舫歸時重青編到日成惟應問俗者因爾得風聲

燦明叟修崇慶寺

壞刹連囂市新功啟施財斧斤雲外集樓觀日中開紺  
樹明珠網青蓮映寶臺極知龍象法終倚棟梁材  
銀漢興危構金輪轉大車像嚴香是國僧至飯如家半  
嶺晨飛錫諸天晝雨花林泉渾欲改城市忽疑賒

西隱菴

大隱還依市空林舊結廬猶聞拔宅去誰見入壺居園  
樹圍僧衲山花落梵書幽人數來往高興定何如

送鞏志道桂憲史

憲史才名舊南遷歲月遲湘中獨發夜嶺外早行時暑  
雨過榕樹涼風起桂枝殊方慎寢食莫遣鬢成絲

相見嗟已晚相知情獨真  
一生多好直終歲少言貧  
豈是輕微祿祇應念老親  
送君徒悵望心迹不堪陳  
五嶺連烏府羣賢列繡衣  
閉門文史足巡郡簡書稀  
日月明丹徼風霜滿翠微  
時勞念疏遠吾道亦光輝

臥病

風雨長沙郡泥塗陋巷居  
病嗟眠食少貧覺往還疏  
楊柳低窗溼莓苔映座虛  
淹留未足恨昆弟久無書

志道雨中留飯

急雨侵危坐長衢滯獨行  
乾坤一氣塞溝壑眾流生  
巢鳥憂漂戶江鷗喜結盟  
主人因飯客對此未忘情  
箕畢星多好江湖水亂行  
暑兼雲氣溼秋共客愁生  
東

海猶聞變南夷數背盟相逢得相慰世故莫關情

張振卿見訪和韻

飄泊憐生事經過念索居紫苔歸鶴晚青竹照螢疏避  
俗門多掩期人席久虛題詩擬相屬桐葉正堪書  
近聞長者轍能到故人居青眼非關傲蒼頭或見疏孤  
城秋水迴高樹夕陽虛相見池亭裏歸來試草書

挽黃君政

棄吏初安業遺榮樂暮年藥同康伯價書與石公傳庭  
月餘秋樹湖雲隔夜泉岳陽耆舊在揮淚鄂山前

竹樹圖

匠石求材盡伶倫製律餘畫圖開莽蒼窗戶起蕭疏江

漢秋雲迴瀟湘夜月虛故山泉石在種植意何如

挽朱斗南

鄉里生離亂正園老治平讀書長嗜義推食豈求名南  
斗龍光在西岡馬鬣成兒孫哭遺業寒日黯銘旌

常寧劉百戶園林

勝地通虛館遙天出亂峰市聲臨水絕雲影到池逢谿  
篠搖飛鳳庭柯走蛻龍田廬應可老尊俎日相從  
頗愛將軍第幽同處士園石浮春雨翠谿抱夕陽暄虎  
龕空懸壁熊車數過門遙疑花樹底雞犬近仙源  
少壯從戎事歸休遂野情鶡冠時自著龍劍夜猶鳴竹  
下思羊仲瓜前感召平知君縱幽賞心已薄浮名



春日名園好常時俗客稀樹閒斜引徑花外別開扉沙  
鳥隨行熟池魚上釣肥往來祇適興出處已忘機  
小隱依侯甸芳筵照客星傍梅杯瀉白當竹座含青山  
氣分南岳江光赴北亭暫游聊自記重到憶曾經

善原道弟原性處問舍弟信

令弟來衡岳何時出桂林干戈百粵外舟楫五湖深惜  
別長回首言歸總慰心嶺南予季在書問豈浮沈

送巴陵諭張復心

化俗須文物成功錄歲年祿微那避事官冷亦稱賢俎  
豆諸生在弦歌一邑傳洞庭臨別日總有送行篇

挽楊都曹

郡縣師秦吏江湖屈楚材上官勞薦引中路坐迂迴賓  
幕秋蓮廢仙源夕樹開佳兒舊相好聞問不勝哀

美齊東王師獻

聖代昭耆德王家重伯兄性疑元亮簡心見伯夷清海  
岱成高隱江淮罷遠行潛夫堪著論處士豈虛名

太史書遺逸今時見古人曾參無更娶原憲有長貧糧  
絕寧終餓廬焚竟自陳高情嗟已矣薄俗媿眞淳

又上人求母沔陽

開士辭家早慈親割愛深倚門思一見飛錫誓相尋雁  
度雲移寺鳥嘯月照林此時憂白髮長路政關心

受法從西竺懷恩限北堂書來一灑淚經罷九回腸漢

沔連春水江湖散夕陽袈裟柁樓底遠色正蒼蒼

答楊聞禮

家學存先業囊書受異人江湖行欲徧山水宿相親黃  
壤羅翁仲青雲滿搢紳百年多宅兆融結任鴻鈞  
城市逢君地庭軒爲客開花陰通杖履木末見樓臺對  
雨傳飛屐看雲撫畫疊淹留未覺久猶恐過黃梅

和贈陳與之

午日清江道南風滿綠蘋暮年爲客健長路對人貧憶  
弟餘雙鬢還家稱一身有孫堪慰眼莫厭把杯頻

桃源圖

聞說避秦地花開忘歲年偶逢漁父問長使世人傳

壑渾疑幻林廬或近仙至今圖畫裏惆悵武陵船

送雲門師遊瀾

杖錫違蕭水風帆向武林海紅秋樹遠江黑暮鐘深雲  
起通香氣潮來合梵音亦知無住著隨處得安心  
吳越青山亂隋唐古寺多雨中持鉢去松下棹船過業  
淨唯詩在心空奈法何故山明月夜猶恐憶煙蘿

傳與礪詩集卷之四